



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com




TAPAK 9

Prangpong mebeni alir sepai tepsetbaji tasumait mapa ka lir: Jaitley

TAPAK 7

Gl Joe yanglutetsang, Stanley Weston süogo



VOL. XIV NO. 201 (ADOK 201)

DIMAPUR

THURSDAY

MAY 11, 2017

5.00

## Director General Assam Rifles-i Nagaland sendang



DG Assam Rifles Lt Gen Shokin Chauhan-i Nagaland Chief Minister Dr. Shurhozelie Liezietsu den ajurutepdang agiba noksa angur.

**Dimapur, May 10 (TYO):** Director General Assam Rifles AVSM, YSM, SM, VSM, Lt Gen Shokin Chauhan-i anogo ananü atema Kohima nung amungdang Nagaland Chief Minister, Dr. Shurhozelie Liezietsu den ajurutepa senden ka amen.

May 8, 2017 nü Director General Assam Rifles aser Nagaland Chief Minister tsüingda senden amendang Nagaland dak sendakba security onüktem lemsatep aser iba mapang Lt Gen Shokin-i Dr. Shurhozelie dang 'Friends of the Hill people' omen ama Assam Rifles-i inyaksü ta nangzük, ta Lt Col Amitabh Sharma, PRO HQ IGAR (N)-i

Bodbar nü sangdong ka nung metetdaksü.

Lt Gen Shokin ji Assam Rifles U-19 Oorja CAPF Talent Hunt Football asayamung tembangba sentong nung adentsü atema aruba liasü. Iba asayamung ya Prime Minister-i linük nung football asaya ajungkettsü atema MSN XI Million maparen kübok ayongzüka asaya, ta PRO HQ IGAR (N) sangdong nungsa shia lir.

Director General-isa Assam Rifles ketdangser aser sepaitem den ajurutepa sensaksema liasü aser idangji pai bendanga agütsür mapa inyaksü ayongzük, ta Lt Col Amitabh-isa metetdaksü.

## NBSE-i NSEE indang metetdaksür

**Dimapur, May 10 (TYO):** Para medical/Agri aser Allied courses atema Nagaland State Entrance Examination (NSEE) 2017 May 13, 2017 nü agitsü, ta Nagaland Board of School Education(NBSE)-i metetdaksü.

NSEE tatidang indang Provisional Admit cards ji NBSE office nung May 11 aser 12, 2017 anogotem angutsü aser admit card agizükdang Examination fee sen 500

agütsüsüla, ta NBSE-isa ashi.

NSEE Admit card agizükdang kaketshirtemi HSSLC mesüra HSLC Examination indang admit card (original/photocopy) bener arua sayutsüla aser tatidang agidakia admit card bener arutsüla. K a k e t s h i r t e m i www.nbsenagaland.com nung pei indang roll number aser tanga telatetbatem metettsü, ta NBSE-isa metetdaksüogo.

Sl.no.	Centre	Roll nos.
1.	Mezhür Hr. Sec. School, Kohima	70001 - 70700
2.	Ministers' Hill Baptist Hr. Sec. School, Kohima	70701 - 71200
3.	Bethel Hr. Sec. School, Kohima	71201 - 71473

## Mkg nung GST awareness training akatsü

**Mokokchung, May 10 (TYO):** Central Excise & Customs Department (Govt. of India) den yaritepa Deputy Commissioner of Taxes Mokokchung Zone-i Goods & Services Tax indang tali angajemtsü atema 'GST Awareness Training' ka May 12, 2017 nü anepdang 10:00 ako

nungi tenzüka Mokokchung town hall nung ayongzüka akatsü, ta osang ka ajanga metetdaksüogo.

Iba sentong nung dealers-tem ajak arua adentsüla kechiyong iba training ya nenoki aginüba ama sorkari ayongzük, ta kasa osang nungsa metetdaksü.

## India sorkari NE nung nüjiso atema raraba miimbanga ayur

**Dimapur, May 10 (TYO):** India kübok Northeast tesem nung nüjiso bushiba maparen ya India sorkari 'law & order' tebilemtsü ka ama sayur aser alima dang iba tesem nung rara mali ta ashir, ta Centre for Refugee Law Studies and Research (Guwahati University) Director, Prof Subhram Rajkhowa-i tanü ashi.

Alima nem memetdaksütsü aser meimchir temeden atema inyakba teloktem dang miimbanga ayutsü atema India sorkari yamaji ashir, ta paisa ashi.

Bodbar nü Hotel Acacia, Dimapur nung shisatokden ka nung Prof Subhram-i meimchir temeden atema jembidang, "India-i northeast nung nüjiso atema raraba ya 'law & order' tebilemtsü ta ashiba ajanga International Committee of the Red Cross (ICRC) arutsü nokdang. Anungji, asenoki nübortem dang meimchir temeden atema osang tejangja metetdaksüsüla" ta ashi.

"Kodang 'law & order' tebilemtsü ta südir, iba jagi alima

nüjiso atema raraji alima tsüingdang miimbanga ayur. Alimai kodang nüjiso atema rarar ta agizükdir, parnoki iba tebilemtsü aliba linük dang parnoki agia aliba litsü meyipa agüjang ta tetuyuba agütsür. India sorkari alima tsüingdang northeast nung nüjiso atema raraba inyakyim ajembanga ayur" ta Prof Subhram-isa ashi.

Northeast nung nüjiso atema inyakba teloktem jungjunga tenteta lir aser parnoki meshiba litsüjia shitak lateta lir, anungji nüjiso meshitsü atema temsüa lir, ta paisa shisem.

Shisatokden nung Kohima Science College Principal, Dr. Anungla Aier-ia tetsür akhümtsübuttsü dak sendakba onük jembidang, "sobaliba temzüng-ozüngtem ajanga tetsürtem tashi maiter. Tesüiba mapangtem nungbo sobaliba temzüng-ozüngtemji tapet liasü saka tanü putu nungbo, aika meputep kümogo, anungji temelenshi kar nüngdaker" ta ashi.

"Naga nunger, teburi senmanga aruba lokti aser tanü alima ainba na tsüingda nokdaka lir. Naga loktiliba nung Naga tsürtem ola mangashir aser nembangtsür aser ajaklen teburtemi amokbanga aliba ajanga tetsürtemi shilem magiteter," ta laisa ashi.

Naga nungeri tetsürtem akhümtsübur ta asübaji kalenbo shitak, saka chichiba senso ka ama telemtetba agiba inyakyim nungbo tetsürtem temeden mali aser tetsürtemi tetsükdaksü aika ajurur, ta Dr. Anungla-isa shisem.

Naga nungertemi meimchir temetentem alema inyaker aser tanü asenoki tetsür-tebur kasa jenjang kati bener marura, tarutsü pututemi tetsükdaksü jenti ajurutsü, ta laisa metetdaksü.

Prodigals' Home Director, K Ela-i tanur temeten indang jembidang, Nagaland nung aser talisa Dimapur nung tanur temeten alema mapa inyaker aser anogoshia tanurtem madak tashiyim amshir, ta ashi.

(Maneni tapak 11 nung...)

## June 5 nungi HSLC Compartmental Examination 2017 tenzüksü

**Dimapur, May 10 (TYO):** HSLC Compartmental Examination 2017 June 5 nungi 10, 2017 tashi agitsü aser tatidang indang routine ji NBSE website nung sangdongtsü, ta Nagaland Board of School Education (NBSE)-i metetdaksüogo.

New Course kübok HSLC Examination 2017 agütsürtem aser subject 3 mesüra tajemba nung "Needs Improvement" grade angurtemi Compartmental Examination agütsüsü akok aser

tatidang fee ji subject ka nung sen 250 asütsü, ta NBSE-isa ashi.

Ajisüaka, HSLC Old Course 2017 kübok tatidang agütsürtembo HSLC Compartmental Examination 2017 agütsüsü makok, ta NBSE-isa shisem.

HSLC Compartmental Examination 2017 agütsüsüpurtemi pei HSLC 2017 Examination Centre den tongtepratepsüla aser designated Centre Superintendent ajanga candidate indang application form

yoktsü. Candidate temi designated centre agütsüsü atema tatembang anogoji May 20, 2017 asütsü, ta NBSE-isa metetdaksüogo.

Centre Superintendent temi May 23, 2017 nü Board indang Office nung form aser tanga kulikakettem agütsüsüla aser HSLC Compartmental Examination 2017 nung takok manguba kaketshirtemi HSLC Examination 2018 nung subject ajak agütsüsüsa akümtsü, ta NBSE-isa ashi.

## NPF central team-i anir Mkg dist kübok constituency-tem sema jajar

**Mokokchung, May 10 (TYO):** May 9 nungi tenzüka Naga People's Front Working President & Advisor to Chief Minister (Political) Wb. Huska Yepthomi-i anir külem NPF central office telen balala nungi aser NPF Mokokchung Division ketdangsurtemi Mokokchung district kübok constituency-tem sema party tenzükertem den telungjem senden kayonga jajadaki.

Tanü Huska Yepthomi-i senden ka nung jembidang, iba telungjem senden ya tongtibangsa tang sorkar jenjang, tia aser inyakyim balala party tenzükertem dang lemsatepsü nükjidong nung constituency balala semyonga jajar, ta ashi.

Paisa ULB election indang onük kar süokdang, sorkari nübur den tongtepratep magii kecha meinyaker asünung, iba dak sentakba nung kin balala lenirtem

jaoka telungjem senden 14 ben tashi menogo aser parnoki municipal act nung mapetbatem yanglushitsü ashiba ama, itemji yanglushir külen sorkari election agitsü sangdong, saka tesülen ano Naga nunger sobaliba tzüzüng ozüng (Naga customary law) bener arua ULB election nokdanga liasü, ta kuli kar ashi.

"Amajok nung office aser ki aika raksabaji Naga nunger sobaliba ozüng asü?" ta paisa asüingdanga ashi. "Naga customary law tenüng amer asangur chanu ana tashi taküm laluogo, nisung kari pei ajung asaa inyakdang nüburtem kanga timatemer", ta paisa shisem.

Aji oda, Supreme Court-i mashi mapang ka nung ULB election dak sentakba nung obandang agütsüsü, saka yakta agütsüsü imlar, ta paisa ashi. Asenok India kübok ali tashi India nunger temzüng kübok

alitsüsa akümtsü, ta paisa ashi.

Paisa Arla 371 (A) indang jangjashitsüdag, iba arla ya tim masü ta süra Naga nungeri anem meso, iba arla dak sentakba nung taküm aika laluogo, saka tanübo kin telungjem (tribal hohos) lenirtemi iba arlaji kümzüka ayutsü meranger, "Naga nungeri bendanga agütsüba mapa ajak kin hoho lenirtemi samatsüogo, anungji, parnokji Naga nunger anemertem lir", ta paisa aitsü.

Naga nunger nem statehood agütsüba ya tatembang masü ta India sorkari meteta lir, iyongjiang yimjung kishi (ceasefire agreement) lapoka keno jembir. India sorkari arla 371 (A) dang nungi alia asenok nem jenjang agütsünür, saka asenoki arla 371 (A)-ji dang kümzüka ayutsü meranger, ta paisa ashi.

(Maneni tapak 12 nung...)



## Dr. Benjongliba-i NSF Mungdang ki teyangludak semdang



Chungtiayimsen (Mokokchung), May 10, 2017: May 06, 2017 nü CAWD & Taxes Parliamentary Secretary, Dr. Benjongliba Aier-i Chungtiayimsen nung taküm May 30 nungi June 1, 2017 tashi amungtsü aliba NSF Mungdang ki teyangludak semdangba mapang tangokba noksa nung angur.

**Mokokchung, May 10 (TYO):** May 06, 2017 nü CAWD & Taxes Parliamentary Secretary, Dr. Benjongliba Aier-i Tzurangkong Range kübok

Chungtiayimsen nung taküm May 30 nungi tenzuka June 1, 2017 tashi amungtsü aliba NSF Mungdang ki semdangogo. Dr. Aier-isa tang teinyakdak

mapa balala indang Tzurangkong kübok yim 8 nungi Village Council züngsemtem den jembia liasü.

Tang teinyakdak mapatem ajanga pa kanga melungsiä liasü, aser pai züngsemtem dang, NSF mungdang takok ngua katettsü atema maneni kanga meranga inyaksü mepishia metetdaksü.

Mungdang ki semdangba sülen pai Council züngsemtem aser kaketshir lenirtemi parnoki ajangshiba timtem onük balala metetdaksüba sülen mungdang takok ngua katettsü atema mera tajungkar agi.

Iba sülen Dr. Benjongliba Aier-i Boarder Magistrate, Tzurangkong aser tanga ketdangsertem den külemi Merangmen Headquarters semdanga onük balala nung o lemtepa liasü.

## AR sepaitemi office mita repringba GPRN/NSCN-i aitsür

**Dimapur, May 10 (TYO):** May 5, 2017 anügdang 11:15 ako meta Second command, Shyam Sundar Shah leniba nung 36th Assam Rifles sepaitemi Jalukie town nung Asalu Zeliangrong Region Administrative Office mita repringba sülen züngsem ana den taküm melenshidaksütsü aser rehabilitation atema ayuba civilian tenet apuba atema NSCN/

GPRN-i jashiba den külemi aitsür, ta tanü NSCN/GPRN, Ministry of Information & Publicity-i sangdong ka nung metetdaksü. 36th Assam Rifles sepaitemisa ceasefire ozüngtem alema office nung prangpong, injang aser kakettesem bener aobaji metetsümunga yimjung raksatsüba aser yimjung meimer Zeliangrong sensotem

melungjang nung tetsüba aitaidsüba lir, ta kasa sangdong nungsa shia lir.

Anungji, telok ana tsünga tesendaktep atema 36th Assam Rifles dang tekaraba nung official kakettesem, prangpong aser injangtemji cease fire Monitoring cell Office nem meyipa agüjang ta metetdaksür, ta parnokisa shisem.

## Dimapur nung Hotel temi 'Smoke Free Campaign' nungiter



**Dimapur, May 10 (TYO):** May 10, 2017 nü CMO Conference Hall nung Dimapur nung aliba hotel tem atema COTPA 2003 kübok section 4 dak sendakba awareness sentong ka agiogo, aser iba sentong nung

tongtibang hotel 15 nungi Manager tem dena liasü.

Iba sentong nung jembidang DNO NTCP, Dr. C Tetseo-i, hotel tem nung moko achiba mesüra moko pongsang intokba (ashtray) aser mitsütsü ayutsü

memelar, aser hotel temi ibaji tezüluba nung zülua ayutsüla, ta metetdaksü.

Iba section kübok aibelenra senchi 200 lir.

Iba dak sendakba nung Dimapur nung hotel 15 nungi manager temi 'Smoke free Dimapur' mapatong nungittsü melungogo.

Dr. C Tetseo-isa tanga hotel tem danga 'smoke free' telatetba nung anidaksüla ta ajungshiba den mapangshia hotel tem mita repringtsü, ta metetdaksü.

## GPRN-i nüburtem dang tekümdangtsü sangdonger

**Dimapur, May 09 (TYO):** Tang ama tensa ka nung Naga nung sobaliba menenja ozüng alema inyakba mapatem aser lokti nung temenentem nokdangtsü nükjidong nung Ministry of Kilo Affairs Secretary, M. Daniel Lotha-i Dimapur aser temeket nung

Crime Suppression Department (CSD) nem officially mapa lemsütsü, ta GPRN Secretary, M. Daniel Daniel Lotha-i sangdong ka nung metetdaksü.

Iba dak sendakba nung nübur ajak dang ozüng alema inyakba aser temenen mapatem mebenshitsu mepishia

metetdaksür, ta sangdong nung shia lir.

Iba tetuyuba nung manidakra tapet temerenshi agütsütsü. Iba den külemi CSD inyakyim nung mangatetba mesüra terataba lira item mobile no. nung tongteprateptsü akok. Contact: # 9856071655 # 9436971965

## HEALTH NURSING SCHOOL



Singrijan, Dimapur  
(Recognized by Indian Nursing Council (INC)  
Affiliated to Assam Nurses' Midwives' and Health Visitors Council  
Approved by Govt. of Nagaland)

### ADMISSION OPEN FOR:

1. GENERAL NURSING & MIDWIFERY (GNM)
2. AUXILIARY NURSES & MIDWIVES (ANM)

(Last date for receipt of application forms : 25th June 2017)

Forms and application forms can be obtained from the office during office hour

For more information you can visit our website: [www.healthnursingschool.com](http://www.healthnursingschool.com)

Or email us at: [healthnursingschool@gmail.com](mailto:healthnursingschool@gmail.com)

Contact : 9856583312, 9774043387

9615912201, 9856842203



OFFICE OF THE

## AO SENDEN

H.Q: MOKOKCHUNG : NAGALAND

Ph: 0369-2228896/ e-mail: [aosenden@gmail.com](mailto:aosenden@gmail.com)

Date: 10-05-2017

### PELABA METETDAKTSÜR

Asen Aor meraket Moatsü benjungmung May 2, 2017 anogo Ao Senden ajanga Angami kin jaoka külem kin ana jungshitepba benjungmung tulu nung teyariteper yimden aser lokti balala ajak dang pelaba metetdaksür. Maneni sentong nung shilem agirtem aser asen Aotsür-Aortemi pi kin matsügdang yimya awashi tajung sayutetba asoshi nenok ajak dang pelaba Ao Senden mendenti nungi metetdaksür. Teküpöklen agüja aliba kija aser loktitem dang kangasa pelaba shisemer:

- |   |            |
|---|------------|
| 1. Satsü Village Council                      | ~ 1,000/-  |
| 2. Tenymia Union Mokokchung                   | ~ 2,000/-  |
| 3. All Ward Union Mokokchung                  | ~ 5,000/-  |
| 4. Yimyu Ward Mokokchung                      | ~ 5,000/-  |
| 5. Sumi Community Mokokchung                  | ~ 1,000/-  |
| 6. Wb. Lipoknungsang ADS Mokokchung           | ~ 2,000/-  |
| 7. Langpangkong Tzükong Mungdang              | ~ 2,000/-  |
| 8. CNTC Nagaland                              | ~ 10,000/- |
| 9. ENPO Nagaland                              | ~ 10,000/- |
| 10. ENPUM                                     | ~ 2,000/-  |
| 11. Ungma Village Council                     | ~ 5,000/-  |
| 12. Shalom Prayer Cell, Ungma                 | ~ 500/-    |
| 13. Artang Ward Mokokchung                    | ~ 1,000/-  |
| 14. Penli Ward Yimten Mokokchung              | ~ 1,000/-  |
| 15. Jangpetkong Senso Mungdang                | ~ 2,000/-  |
| 16. Ao Senso Telongjem Dimapur                | ~ 5,000/-  |
| 17. District Dobashi Customary Law Court Mkg. | ~ 5,000/-  |
| 18. Zunheboto Aor Telongjem                   | ~ 2,000/-  |

Item ajak dak alia Nagaland Chief Minister, Dr. Shurhozeillie Liezietsü-i sentong meraketdakja arua adenba den tenla tajung agüja iba sentong nung shilem agiba asoshi kangasa pelaba shisemer.

Sd/-

C Angang Jamir,  
Acting President

Sd/-

L Tally Lkr  
Acting Secretary.



NATIONAL BAL BHAVAN

(An Autonomous Body under Ministry of HRD)  
Kotla Road, New Delhi -110002

NATIONAL BALSHREE AWARD 2016

AFFILIATE SUA ALIBA BAL BHAVAN/BAL KENDRAS ASER BAL BHAVAN MALIBA DISTRICT KETDANGSERTEM DANG NUNGI, NATIONAL BAL BAL BHAVAN (MINISTRY OF HUMAN RESOURCE DEVELOPMENT, GOI)-I TENTETBA NATIONAL BALSHREE AWARD 2016 ATEMA TENÜNG MESHIR

ITEM MAIN STREAM KÜBOK SUBSTREAM 16 NUNG STATE LEVEL SELECTION NUNG SEMPET ALIBA TANURTEM JANGJATSÜ ASOSHI

- |   |                         |                    |                               |                          |
|---|-------------------------|--------------------|-------------------------------|--------------------------|
| A. CREATIVE PERFORMANCE : 1. PERCUSSION/INSTRUMENTAL MUSIC          | 2. VOCAL MUSIC          | 3. DANCE           | 4. THEATRE AND PUPPETRY       |                          |
| B. CREATIVE ART : 1. VISUAL ART (DESIGNING GRAPHIC AND DIGITAL ART) | 2. PAINTING             | 3. SCULPTURE       | 4. CRAFT                      |                          |
| C. CREATIVE WRITING   | 1. POEM                 | 2. STORY           | 3. PROSE                      | 4. DIALOGUES AND PLAY    |
| D. CREATIVE SCIENTIFIC INNOVATIONS                                  | 1. SCIENCE MODEL MAKING | 2. SCIENCE PROJECT | 3. SCIENTIFIC PROBLEM SOLVING | 4. SCIENTIFIC INNOVATION |

ARISHI KÜM TELEMSA 10-12, 12-14, 14-16  
(ARISHI KÜMJI 2016 APRIL 1 TASHI NUNG)

THE PARTICIPANT WILL BE EVALUATED EXCLUSIVELY ON THE CHOSEN SUBSTREAM OF THE MAIN SUBSTREAM USING TOOLS PREPARED BY NATIONAL BAL BHAVAN.

TENÜNG AGÜTSÜTSÜ ATEMA TATEMBANGBUBA ANOGOJI MAY 17, 2017

FOR DETAILS PLEASE VISIT: [www.nationalbalbhavan.org](http://www.nationalbalbhavan.org)



May 10, 2017 nü Aongza ward Health Sub-centre, Mokokchung nung angati medical camp nung doctor tem den Youth Association Aongza ward aser Mokokchung Young Hearts United züngsemtem külemi tangokba noksa nung angur. Medical camp nung doctor temji- Dr. Priyadarshiri Borah, MBBS (Miss Elite 2016) den Dr. Abangdi Changkiri, Dr. Racheal Moangkala, Dr. Kilang Pongener Medicine Specialist aser Dr. I. Taka Pongener, Senior Medical officer nung liasü. Iba camp nung shiranger 200 dak tema arua angati teyari agiogo.



## Manipur nungi NE atema 'air-clinics' sayatsü

**New Delhi, May 10 (Agencies):** Manipur nungi Helicopter amshia Northeast atema 'air clinics' sayatsü, ta DoNER Minister, Jitendra Singh-i tanü kuli kar agütsüo.

Air clinic helicopter service ajanga Outpatient Department (OPD) tem nungi lenmang balala ajanga takutet doctor temi tesem tezülen aliba shirangertem yaritetsü sabang lapoktsütsü. Iba kasa chopper ya shirangertem hospital-i anir aoba aser anir aruba nung amshitetsü, ta Dr Jitender Singh ajuruba sülen Manipur Deputy Chief Minister, Y Joykumar Singh-i metetdaksü.

"Iba mapa takok ngua inyaktetsü asoshi Union Aviation aser Health Ministries ajanga maparen balala inyak tenezükogo. Northeast nung

helicopter service agütsür Pawan Hans aser tanga company tem den maparen tejangja lemsatepogo," ta Joykumar-i ashi.

Manipur nung sorkar tasenba March 15 nung denteter tang tashi mapa inyaka arubatem, Joykumar Singh-i Dr Jitendra Singh dang kasa mensem nung ashi.

Iba mensem nung Manipur Deputy CM den Law & Health Minister, L Jayantakumar aser Youth & Sports Minister, Letpao Haokip nungera oa aden.

Manipur nung advocate tem aser obendangertem nem kiojen peria yanglutsütsü asoshi DoNER Ministry dang teyari meshiba project tem Dr Singh nem Manipur lenirtemi agütsü.

Aser iba mapang Dr

Jitendra Singh-i akokba agi yaritsü merangtsü, ta ashi.

Manipur nung Sports University lapoktsü asoshi tekeraba nung ali peria bushitsü aser iba maparen nung temolung agüja inyakteptsü asoshi Dr Jitendra Singh-i lenirtem dang ajungshi.

Chennai nung aliba Adyar Cancer Institute den yaritepa district nung aliba mozükitem tashi nung cancer tashidak agi shirangertem yaritsü asoshi Centre sorkari mapa tenezükba aser tang tashi inyaka alibatam, Dr Jitendra Singh-i Manipur minister tem dang ashi.

Iba maparen inyakyonga aotsü asoshi Northeast state 8 nung aliba Health Minister tem tekeraba nung ajuruteptsü asoshi Union Minister-isa ajungshi.

## Myanmar ketdangsertemi Arrtsü nung shishilembadak semdang



**May 9, 2017 (Agencies):** Myanmar nungeri India arrtsü nung shishilembadak lapoktsü asoshi tejangraba lemsatepogo. Kidanger linük nungi ketdangsertemi Tripura nung Kasba shishilemba tesem nung inyakyim asadangtsü asoshi semdang, ta India nunger ketdangser kati Bodhbarnü metetdaksü.

Iba sentong ya India aser Bangladesh na arrtsü nung shishilembadak kanga takok ngua aoba mapang ka nung asatet.

"Myanmar Ministry of Labour Affairs Director Soe Paing Myint-i anir parnok 5 aser India nunger ketdangsertemi Mongolbarnü western Tripura kübok India-Bangladesh arrtsü nung Kasba shishilembadak semdang," ta Tripura Industries & Commerce Department ketdangser kati ashi.

Northeast India nung state 4; Arunachal Pradesh (520 km), Manipur (398 km), Nagaland (215 km) aser Mizoram (510 km) Myanmar den arrtsü km 1,643 lemsateper.

Tang tashi nung linük ana tsüngda shishilembadak ka Moreh nung Myanmar tsütsü Manipur kübok Chandel district nung lapoka lir.

"Mayanmar sorkari lokti aser rongen kütsüng nung linük

anaprongla ajungkettsü nükjidong nung arrtsü len shishilembadak lapoktsü asoshi tejangraba ketdangertemi lemsatepogo," ta ketdangserisa ashi.

Indian External Affairs Ministry under Secretary (Myanmar) Tavishi Behal, Union Commerce Ministry Under Secretary Muthu Kumar aser Usha Sreenivasan nungeri Myanmar ketdangertem achaayanga liasü.

Shishilembadak semdangba telok ya Kasba Border Haat Committee Chairman, Sepahijala Additional District Magistrate Manik Lal Das aser tanga ketdangsertemi agizük. Paronki shishilembadak inyakyim den külemi security' aser rongsenketsüng nung maongkatem rasaa ashi.

Iba sülen ketdangsertemi West Bengal kübok India-Bangladesh arrtsü nung Akhaura Integrated Checkpost aser Benapole-Petrapole checkpost semdang.

Arrtsü nung shishilembadak Meghalaya kübok India Bangladesh arrtsü nung Kalaichar-Baliamari aser Balat-Dalora nung aser western Tripura nung Kasba tesem aser southern Tripura nung Srinagar tesem nung lapoka lir.

## 108 Ambulance anir aser paramedic ka tsükogka asü



**Shillong, May 10 (Agencies):** Yi jemer gari anishiba ken o ka nung Bodhbar nü nikongtsütsü Shillong Mairang by-pass nung 108 Ambulance ka longren kati lua tsküokogo. Iba gari tsükokba lendong nung nisung ana asü.

Tenük kuli angurtemi ashiba agi, ambulance-ji kanga karaa anir ao aser gari anisangi gariji maziüokteti Shillong yimti nungi kilometer isheka dang pilar aliba Mawngap yimtsüng anasa longren kati alu.

Police osang ajanga ashiba agi, iba gari lendong Bodhbarnü nikongtsütsü 3:07 ako nung atalok. Ambulance anisangi Mawlai nunger arishi küm 32 tain Eiborlang Lyngdoh ta jangjaogo. Pai gari maziüokteti

iba lendong ajuru.

Paramedic shiba passenger amenba menden nung mere liasü pa ya arishi küm 23 tain Mawlyngwir nunger Kyrshanbor Marwein ta jangjaogo. Dena ya gariji Shillong nungi Mairang-i anir otsüba mapang iba lendong ajuru.

Police osang ajanga ashiba agi, dena Mairang-i aodang gari nung AC Black Whiskey bottle ka angu aser tanaben mebiledmangi aser traffic norms tem sendoker iba yi ajem aser lendong ajurutsüsa gari kang karaa anir ao.

Iba lendong ajanga tasüngdangba aika adokogowhiskey-ji kodaser ambulance

nung ngutet? Yi jemer gari anirtem nem nüburtem mener senzüba gari anishitsüdaktsüra shirangertem aser nüburtem kechi tia ai aitsü? health department-i iba dak sendakba nung süoki iia agir asü magir?

Yi jemer gari lendong ajuruba aser national highway tem nung gari kanga karaa anishiba ajanga ajak lendongbang nung toktsüba ya Meghalaya nung osang tasen masü. Taküm küm tetenzüklena tata gari ka nüburtem belenshiba gari ama anishiba ajanga lendong ajuruba osang temai adoka liasü.

Iba ken o dak senkdakba nung ketdangsertem-i mapa shidak meinyakba atema aprnok lendong nung lir.

## Meghalaya nung mozü anema tetsürtemi longjemer raratsü



**Shillong, May 10 (Agencies):** Meghalaya nung temesepba mozütem amshiba ya loktiliba tebilemtsü tulu ka kümogo, aser talisa state yimtiba, Shillong nung temesepba mozü achir tali zünba atema tebilemtsü kaa iba tebilemtsü aema raratsü atema MLA, Bah Paul Lyngdoh leniba nung tetsürtem longjemogo.

Taoba Deobarnü Shillong, Nongsophoh kiyong nung senden ka alidang tetsürtem tentet ka melatsü atema jembia liasü, aser ibaji melaogo.

Arrtsülen ozüng alema inyakba mapatem tashi taitba kümдар aser tawa state assembly nunga arrtsülen nungi ozüng alema mozü jenti shibelenba tebilemtsü atema jembia liasü.

Tawatanü yimti nung police-i temesepba mozü dak sendakba nung nisung aika apur.

2016 küm nunga Shillong nung customs sepaitemi heroin den Methamphetamine (meth) mozü süngiang 20,000 shi apu, aser ibaji International market nung sen crore 3 shi jenjang lir.



Guwahati, May 10 : Bodhbarnü Guwahati nung Buddha Jayanti amongba mapang Buddhist yimsü amangertemi Buddha temple nung temo milen tsüklok dang tangokba noksa nung angur.



# TIR YIMYIM YIMOBILEM (EDITORIAL)

DIMAPUR THURSDAY, MAY 11, 2017

## TIR SHIMTSÜBA MAPANG

India nung yimten mazüngi lidaktsüba mapaji election agiba sentongtem ya lir. Aji oda, election ajanga dang center aser state government akümer aser election ajanga dang tir aser tadong tir shimer asünungji küm shia election ka mesüra kabo tesem ka nung mesüra ka nungbo agidagi. Aji oda, taküm kuma state ishika nung election agiba sülen tang ita asem pezüka tsüngda tir aser tadong tir shimtsü anendaka lir. Aji oda, tang mapangba ya yimten telok ajak iba election dak rangloker tetemsü nübo bushiba mapang lir. Atangji, tang ya center nung BJP teloki yimsü asüba mapang lir aser tan mapang tatsüka tsüngda nung state aika nung BJP government kumadokogo, anungji tir aser tadong tir na pronglaji BJP teloki mulungba nisung shimtsü amai parnoki jembir. Ajisüka, BJP asoshi timtem kaji Lok sabha nung parnok teimba süaka Rajya sabha nung parnok ishinba, anungji opposition telok ajak longjemer nokdakra parnoki makoktsü. Iba jenjangji meteta tang Congress teloki opposition pur ajak longjemer ajaki mulungba nisung shimteta tir aser tadong tir kumdaktsütsü asoshi mapa inyak tenzükogo. Atangji, pei mulungba nisung ka tir shimtsübaji BJP dang nungibo Congress asoshiang tasakba asütsü. Ajisüaka, Congress teloki BJP den madenba yimten telok ajak tonga oagi jembitet nungbo BJP telok asoshia tebilemtsü tuluka asütsü. Aiben tir shimba mapang yimten telok ajaki mulungba agitsü meranger, ajisüaka yimten nung telok ajaki mulungba nisung ka shimtsübaji tasak akümer. Iba jagi 2002 kum Atal Bihari Vajpayee-i aniba BJP government mapang APJ Abdul Kalam yimten telok ajaki mulungba shimtetba dak alaka tangarbo shima mali. Iba mapangjia Left telokibo Abdul Kalam shimtsübaji memulungi liasü. Atangji, Vapyapee mapang BJP teloki aniba government ya tang Narendra Modii aniba government nung ama Lok sabha nung parnok kija nübo agi abensaa tashi itta mali asü. Ano, metensür APJ Abdul Kalam-ia yimten telok ajakji mulungba ka mesüra pai BJP teloki aginüa shimtetyonga pai meinyaktsü ta aküm. Iba jagi Vajpayee-i Congress tir Sonia Gandhi den jembir aser parnok ajaki mulungba Abdul Kalamji shimtet. Pa dak alaka pa sülen arur Pratibha Patel aser tang teinyakdak Pranab Mukherjee na prongla ya Congress teloki anir yimsüsüba mapang parnoki shimba lir. Aji oda, Congress teloki yimsüsüba mapang parnoki mulungba nisung shimba amato BJP telokia shimnüsü, ajisüaka Congress teloki tangar teloktem den tangatettep kati arutetra, iba jagi BJP telok nüma alutsüsa kumdaktsütsü. Sonia Gandhi-i yimten telok Communist Party of India (Marxist), CPI, Samajwadi Party, Rashtriya Janata Dal aser National Congress Party nungertem den külem ser tir atema nisung bushitsü mapa tenzükogo. Ano, Congress den külemi maliba telok Biju Janata Dal nungertemibo Congress den longjemer inyaktsü nungnantüsü akok, saka ano Congress asoshi tajung kaji Trinamool Congress aser Bahujan Samaj Party ama denbo tangatettep nung külemi telemtetba agitettsü. Tamil Nadu nunga AIADMK telok BJP den junga mali, anungji Congress teloki anir arutettsüa akok aser DMK telokibo Congress telok den mulungsüa adentsü. Iba amaji alima tulu nung telok aika den jembitsü alinungji Congress teloki mapang tatsüka meranga jembia senzüa BJP teloki aniba government nung madenertem mulungjang koktetra, ibaji Congress telok asoshi takok tulu adoktsü. Aji oda, Rajya sabha nung BJP telok purtem nübo abensaa makumdang, tir aser tadong tir shimtsüba mapa ya Congress teloki süokia ia telok balala den jembia inyak nungbo BJP telokia Congress teloki shimtetbajang agila. Tang mapangba ya yimten nung Congress asoshi takok angutsü lenmang tilaka lapoka alibaji tir aser tadong tir shimba mapa ya asütsü. Iba mapa nung Congress teloki takok ngutetra, Modi-i aniba government-ji nübertem asoshi tajungba lemteta inyaka aotsü teimla tulu lir.

## OLEMSABANG

### SUBONGNUKLU MONGSENYIMTI

- Mrs. Meyisongla, Retd Dy Director Nursing Kohima

Tsüngremi tobur junga aser kanga temsüa yangluba limaji Mongsenyimti yim aser alushi yaa ka asütsü südi. Tenem tulu mejungketa tur tenem lenden lisa tesatem. Küm tepiyong mopung tera mokonga aoner. Anü tatok tayi anülih, yimsü kanga tobur tajung telinütsüka lir. Aso 16 shi ogo, Mopungchuket yimtiba nungi oboula Noklangjei Ozükümi anir alua akümba yim lir. Noklangjei japaso asem liasü. Nokpenjang, Nokjungba, aser Elangba liasü. Mongsenyimti yimküm nung Ozüküm kinji kangasa moamejia aser azukarua lia aru. Takataiter, nokinketer aser shisa kar jenti sotet dak yimkong, kü Mongsenyimti yim. Aluyimtsü asoshi lisa tajung aser tetemsü. Ali temo lima. Alu meyimtetsüa longren longpang yaata mali. Alushir tulu lir, iba jagi kanga yimchiyimjunga moko mersü agi manungi aru. Liper kong kolang tenem ajungketa tua alidak penzü sapang tajong yanglua lir. Yang nung jagi alimaji temenungratsüka angur. Himalaya tenem nung rujeb alaba kanga prangshia angur. Mat-4:8 mojingi Yisüji tenem kanga talang kati anir atu aser pa dang alima yimlitem ajak aser item sentsüwangshi sayuba medem- iba penzü sapang nungi alimaji kanga jangratemtsüka angur. Iba tekong nung metsüben naro (Rhododendrons) ponga liasü. Ano süngpur (tsüki) ariju kima naro kangasa tebur tajong aser teronem agi sünga aliba jetaben aser kimonger narotem ajak Armyi 1956 kum April 30 nü yim ajak metsü kuma rongdoktsüdang item ajak rongdoktsü. Arem min tulu ali nung, ozüsangnu jenti eg, yimyi ozü, örük aser ozü tapu jenti liasu. Arem nung süngjanglijang aika aliba agi shiruru jenti liasü. eg Shihtsü, shingo, keyi, pongzü, shihti jenti liasü. Mongsenyimti yim teyong nung long kangasa tuluka kurah mesüker (tortoise) mezüdaka lir. Iba long yagi yim anüker aser warashira mopung tamajung nungi yimer kumzükker ta amanga külem. Ano anüdoklen leper kong tsüng langdang long kanga tuluka shihti (Elephant) mesüker iba long yagi arur tsükchirtem nungi kumzükker. Anungji arlepi aodang iba long tsüngrem kulemshirsa ao aser takok tulu ngursa aruba otsü lir. Item long tenüngteta maja oboula or tampuhsang ta dangsa jaa aru. Iba yimkong ya shisa takar aika sotetdak yim. eg Mokokchung nung republic day amongdang Aortem Nülak songdang- Mr. Yarinnungba, Mongsenyimti first adok. Idangji Mr. Hokishi- chief minister Nagalandi pa dang na item shisatsü kong nungisa angur ta asüngdang, pai ashi tukur, nenokbo shisatsüji kakat aika azüngba nungi angur saka nibo Tsüngremi angati agütsüba amshir ta langzü. Ao lima nung pa kanga nungtugu shisa kar nisung ka liasü. First world war nung German tawa-i Mr. Limanganzuk Ozüküm, Dobashi anir tashi tait aser tasü tait parnok 13 ao. Iba war nung pa nem "veteran man of wisdom title" agütsü. Nisung mashiibo pa den toktepa mejembitet. Kangasa tashi tait nungtugu nisung Mr. Kesanüken i longzük long tulu kg 150 Elang ayong nungi longzukmen (4 miles) tashi kena maneni apur adok. iba long ayuba jaka dang longzük men ta ajar, aji tanü tashi alu talen aser aremlongen len senzür ajak nok arangshir. Ano British nungeri ozüng agüja longmi süngküm tulu sür talang teyi (8) langa apur Mongsenyimti yim nungi Mokokchung tashi apur tua agütsü. British nungera süngmangba otsüren lir. Pa nem "Herculean" title agütsü. Mongsenyimti nungi Mokokchung tashi (22 kilometer) nokinketer aser taka taiter yim, konang narokem agüja onüla nunger ken mejemer aika liasü. Birtish nunger Ao lima nung Dak Bangalow lapoka par flag mezüng mesoba yim, August ita 1888 kum liasü. Mr. Porteousi British nunger SDO Civil-i Ao yim 33 nungi yimtsü-yimbotem aika jadana meeting tuluka aka. Ao lima nung par tamaren yimli tashi itta aser ulushia yanglutsu indang aser House tax agitsü indang jembir. Iba ama tamaren yimtsüng, takar ka kibong nungi Mr. Sübongnuklu soa intet. Pa, Mr. Shilutemba aser Mrs. Pangjungchila jamir na jabaso, 1900 kum aso.

Dr. E-W Clarki Molungyimsen nung par mission center mesemteta yur pai 1876 kum Ao lima yimti ishika sema jaja. eg , Merangkong, Changtongya, Chuchuyimlang, Mongsenyimti, Mopungchuket, Ungma, Longsa aser longkhum yimtem semdanga liasü. Tangarbo idangji-sa tamangba yimsü agizük aser mission school lapoka tashi temetet ngua, kangasa temelenshi tulu nung ali. Saka Mongsenyimtibö Tsüngremi temoatsü tulu agütsüba agi asüküma konang narokem toktepa yongrak mesalatet. Temenen nung süng long külema alitsüang jangratep. Yimsü amanger pari ken tena senzüba agi tepok asüngtsü masü. Shitiji mejaktsü masü, alusa inyaktsüla ta shia kum 40 tashi atsüngzüka lir, 1915 kum, Dr. G.R Bailey- Impur nongi tesayur Waikaba Longpha yok. Amangtsü menokdangtsü ta nangzuükteperang yok. Tesayur Waikabai pa kiji school/tenla ki ama amshia, tamangba yimsü aser shisaliok agütsütsü tenzük.

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir



## Bihar nung sannüker ka züka merenshiba sülen tenarong tajak aküm

**Hyderabad, May 10 (Agencies):** India kübok Bihar nung Hindu nung talila bilemloka oa amangertemi züka merenshiba sülen sannüker ka tenarong jakogo.

Iba lendong ya taoba ita atalok aser Hindu nungertem jagi sannüker Sikandar Kumar dak par kima nung züka merenshi.

Sikandar Kumar dak süng aser yin agi azükba ajanga pa tenarong tajak aküm aser temang nung zübo aika keta lir ta Hajipur government hospital-i kuli agütsüogo, ta Vaishali District Superintendent of Police, Rakesh Kumar-i osangbener dang ashi.

April 5, 2017 nü arishi küm 45 tain Kumar ya Jadhua yimtsüng nung par kidang lia tebur chanu ka cycle ka nung arur par kishi nung akoshi. Tanubosang jagi sannüker aser pa kinungtsü na dang, nisuing telok kati kima nung pa den ajuruteptsü atatdar ta osang

sangoktsü, ta sannüker Arun Kumar-i osangbener dang ashi. "Iba osangji angashili sannüker Kumar kimai alu saka nisung 15 shi kati pa dak azüktsü tenzük. Pai yimtsüng nung nisungtem temulung meypdaksür ta shia süng aser yin agi azük. Pa ali nung laer süchia ao aser pa tekolak nung zübo tulu ka aket aser idak nungjagi azü kanga yimdok" ta Arun-isa shisem.

"Pa dak azükertemi 'Jai Sri Ram, Jai Sri Ram' ta ayimten aser sannüker Kumar süogo ta bilemer oadok" ta paisa metetdaksü.

Police-i nisungtemji Ram külemer Ram Bhakt tem asütsü akok ta temulung melemer bilemer.

"Tenük kuli agütsür shinga maliba agi onoki sannüker Sikandar-i ken o benokba nung ajemdaker temulung melemer bilemer nisung pungu apu, saka pai parnok mejangjatetba agi chiokogo" ta Vaishali District

Superintendent of Police, Rakesh Kumar-isa metetdaksü.

"Pa dak azükertemi pa indang mobile rakzuka bener ao aser hopta ishika osangbenertemi phone asüba ajak agizüka jembu. Ni police dang mobile ji bushitsü atema ken o benokogo" ta Arun Kumar-isa ashi.

"Iba arogo nung kibong 100 dak tema züngsema lir aser Deobar tekülem sentep atemka police-i onok nem security agütsür" ta paisa shisem.

"Sannüker Sikandar Kumar-i iba lendong majurudang, pai police tsüngdang ken o ka benoka liasü. Iba ken o nung February 10, 2017 nü Hindu nung kari pa aser arogo züngsem kar merenshi ta shia lir. Taküm February ita pai chief minister aser aser sorkar ketdangsertem dangia shiditem züluogo saka parnok nungi telangzüba kecha mangu," ta Arun-i osangbener dang ashi.

## Jakarta nung Khristan angh Basuki Tjahaja Purnama küm 2 tepuokdak ayutsü



**Jakarta, May 10 (Agencies):** Indonesia kübok Jakarta nung mezüngbuba Khristan governor Basuki Tjahaja Purnama küm ana tepuokdak ayutsü obendang agütsüogo.

Basuki dang Ahok ta ajar aser pai Islam mezüngmeshiba atema tai tonglokja iba temerenshi agütsür. Iba ya ajanga Muslim nung teimba sü aliba linük nung tamangba yimsü alenbanga ayuba tali jungkai adoka sayur.

Mongulbarnü Jakarta nung aliba okadaki Ahok aitsüba sülen okadak kima nung Islamic pusemertemi "Tsüngremsa tulutiba" ta ola adoka ayimten.

Ahok ya Jakarta nung mezüngbuba non-Muslim governor aser mezüngbuba Chinese lennir kati Indonesia nung angh inyakba lir.

Okadaki obendang agütsüba sülen pai osangbenertem dang iba obendang anema temepishiba ken o ka benoktsü ta ashi.

Okadak nungi pa tepuokdaki anir ao aser ketdangsertemi ashiba agi pa melena Deputy Governor Djarot Saiful Hidayat-i taküm October ita tashi Governor mapa inyaktsü.

Tepuokdak kima Ahok pusemertem aika adenshi aser

parnoki "Ahok Chiokang" ta takhangba agüja lungkak ait.

Yaküm re-election atema nüboyimba sentong ka nung Ahok-i Koran mezüngmeshia o jembu ta tai tonglokja okadak ken o benok.

Taoba ita taruba Jakarta Governor shimtsü atema election agidang Ahok den tokteper Anies Baswedan-i takok angu.

"Iba obendang ajanga Indonesia nung tamangba yimsü alenbanga aliba sayur" ta Human Rights Watch atema Indonesia researcher, Andreas Harsono-i ashi.

"Pa ama yimtenren lennir ka tepuokdak yutetra, tangartem kodsser meyetettsü" ta paisa ashi.

Indonesia nung nütsüng yongsük million 255 shi lir aser parnok rongnung shilem 90 ki Muslim nungertem lir.

Tanüngba tamangba yimsütem rongnung Khristan, Hindu aser Buddhist nungertem lir.

Jakarta okadak iba ken o ya ita ka shi angadanga aruba sülen pai Islam mezüngmeshi asü ta aitsü.

Indonesia nung Islam mezüngmeshiba atema küm 5 tepuokdak ayur saka Ahok bo küm 2 dang ayutsü obendang

agütsübaji tesüngmangtsüka lir. Ajisüaka, okadaki küm sükzüksübaji ken o benoker okatsürtemi ashiba nung ajemdaker agir, aser Ahok anema tokteper okatsürtemi küm ana ayutsübaji shia liasü.

Ahok den tokteper yimten yimsüsürtemi pa dak nungi tashi agientsü atema okadak ketdangsertem nem takhangba agüja arur aser iba jagi okadaki kanga dang ajungbena obendangji agütsü südi ta mongin nisungtemi ashir.

Indonesia Tir, Joko Widodo ya Ahok den teyarirteper ka lir aser pai nübertem dang, "okadaki obendang agütsübaji akhümsübutsü saka ano Basuki Tjahaja Purnama(Ahok)-i temepishiba ken o benoktsü ta asübajia agizüktsüla" ta metetdaksüogo.

Okadaki kima Islamic pusemertem aika adenshia pelatep. "Tsüngrem dang pelar. Pa tepuokdak ayutsüla. Iba ya shitak, pai asenok mezüngmeshiogo" ta Bachtiar ta ser nisung kati ashi.

Ano Ahok pusemer Sari Puji Astuti-ibo, "Ahok-i tai kecha meinyak aser pa yamai merenshitsü malang. Pai onok aser yimti asoshi mapa tajung aika inyaktsüogo" ta osangbener dang ashi.

Yaküm September ita Ahok-i election nüboyimba sentong ka nung Koran nungi tekong ka atishia jembiba ajanga Muslim nungertem temulung yirua liasü.

Pa den toktepertemi ashiba agi, nübertem külakokja pa nem vote agütsüdaksütsü atema Ahok-i Koranic tekongji amshi.

Iba sülen pai jembiba o ji yanglushir online nung prokshi aser ibaji anema Muslim nungertemi pa anema lungkak aitsü tenzük.

## ANO GO ABEN TSÜNGREM DEN

### NENOK MULUNGJANG SHISAANG

*"Kibubai ashir; Tang danga nenok temulung ajak agi nenoki... kü dangi meyipang, Aser nenok süoshi masü nenok mulungjang shisaang aser Kibuba dangi nenok meyipang" - Yoel 2:12-13*

Aseni kanga aginüba oset ka angu aser asenoki meranga asen bushir iba osetji alitet. Asenoki iba osetji kanga meim nung, kanga anepalua meraksatsüsa aser mesamatsüsa amshir.

Tsüngremi asenok takümjia iba amaji südaksüner, kechiaser, taküm ya alima oset den jenjang tuluba lir. Kodang asen taküm tajung kaji asen sasa raksadir yanglushitsüji tasak.

Tsüngremi asen taküm yangluba ya asen sasa raksatsü yangluba masü. Saka meimchirtem ajak tabensa masü nung, asenoki meteta aser memeteti alanger, tsüker, aibelener aser iba ajanga asenok taküm, tanela jenjang raksar. Kodang asenok raksar Tsüngrem jashir!! Tsüngrem kodang ain adokdir asen taküm asoshi teblemtsü tulu alitsü, Saka, asen Tsüngremsa tajungba, pai asenok meimer, anungji shirnok alanger parnok nem taochi ka sayur aser iba taochi ya asenoki angatettsüla, mulungtettsüla, nungmesoba tanela alitsüla aser asen mulungsentü nungji shi-shia kongshiba alitsüla. Tama tazütsü nung bushiba aser melenshibaji Tsüngremi maginer, iba jaki Tsüngremi ashir, nenok süoshi masü saka nenok mulungjang shisaang. Asenok raksar meyip dang, Tsüngremi Ochi tenangzükba, tezüngzüktepa aginür.

#### SARASADEM:

*Kibuba ni aibelenogo, tatok agüjangma, ni tatok meshiba ama ni kü mulungjang temerük aser ochi agi Nü den alitsü. Amen*

## LAKHUNI BAPTIST CHURCH PELABA LEMSATEPER



3rd - 7th May 2017 Lakhuni Baptist Arogo nung Father School "Ni tebu ka lir" omen nung ajemdaker Mangkolemba Baptist Arogo nungi Asso. Pastor Mar Longkumer aser Wati Longkumer tenati anir parnok pongu (5) aruagi ozü arogopur nem rongsen aikati malizükteba temoatsü agüja liasü.

Aser Mangkolemba Baptist Arogo-i Father School kadaktsüba asoshi ozü Arogoi kanga pelaba metetdaksür.

**Temsu Pastor  
Lakhuni Baptist Church**

## TEMEIM TAPU BALALA INDANG LAISHIBA NUNGI TATSÜ AGI LEMSATEPER

**- Dr. Y. Imti Tzüdir, Nuton Bosti, Dimapur**

*(Taoba adok nungi...)*

Agape temeim Lai kar tapu aser tekong dang yamai agütsür; tazüngertemi pei Laishiba lapoka züngdangra tajungba angatettsü.

- 1) Mathi 24:12
- 2) Luk 11:42
- 3) Yohan 3:16;35; 5:42; 13:35; 15:9, 10, 13; 17:26.
- 4) Rom 5:5, 8; 8:32-39; 12:9; 13:10; 15:30.
- 5) I Kor. 4:21; 13:1-13; 16:24.
- 6) 2 Kor. 2.4,8; 5.14; 6.6; 8.7,8,24; 13.11,14.
- 7) Galatia 5.6, 13, 22.
- 8) Efesa 1.4, 15; 2.4; 3.17, 19; 4.2,15,16; 5.2; 6.23.
- 9) Filipi 1.9,8; 2.2.
- 10) I Tesa. 1.3; 3.12; 5.8,13.
- 11) 2 Tesa 1.7,13.
- 12) I Timoti 1.14; 6.11
- 13) 2 Timoti 1.7, 13.
- 14) Filemon 5.7,9.
- 15) Ibr 6.10; 10.24.
- 16) I Yohan 2.5,15; 3.1,16,17; 4.7-10; 4.12,16,17,18; 5.3.
- 17) 2 Yohan 3.6
- 18) Yihuda 2.21.
- 19) J.Adokba 2.4

Tejen Lai nunga iba temeim tekong kar nung yamai angur:

- 1) Anitet 34.6; 2) Isaia 63.9
- 3) Yerimia 2.2; 31.3.

#### Note:

Laishiba nung Tsüngrem temeim (Agape) ya aiben shia lir, saka yangi kar dang agütsür. Aibelena agüja aliyonga melenshia agiangma. Iba agape temeim ya Khristan shia dak alitsüla. Tazüngertem moajang.

**OLONG PAITEP # 4418**

		1			2		3			
4										
										5
6										
							7			
			8							sby
9										
			10						11	
						12				
13										

**TIPILEN**

- 2. Jenti / Moshia - (6)
- 4. Tereprangtsü kasa - (5)
- 6. Tagitsü mali - (8)
- 7. Te \_ \_ \_ \_ - (4)
- 8. Kikümbang - (5)
- 9. Tachitsü meyari - (4)
- 10. Lokti sentepa among - (8)
- 12. Asoshi - (5)
- 13. Teküp takong - (6)

**LANGTSÜNGLEN**

- 1. Tsüngsang dang amshir - (4)
- 3. Aou tapu ka - (6)
- 5. Ki yanglutsü tesem - (6)
- 6. Khuret - (6)
- 8. Lendong nungi jenbu - (6)
- 11. Sarasadem tatembang - (4)


**OLONG PAITEP # 4417 TELANGZÜBA**

**TIPILEN :**

- 3. Tatem, 5. Jabaso, 6. Kotak, 8. Arr,
- 9. Aut, 11. Lungpok, 14. Pua,
- 16. Sen, 17. Mitsa, 18. Nükpok,
- 19. Ozüng.

**LANGTSÜNGLEN :**

- 1. Ajuru, 2. Jaja, 3. Toktep, 4. Tatsük,
- 7. Kasa, 10. Alem, 11. Leptsü,
- 12. Nepang, 13. Temko, 15. Aika.



**ALOKBA-I TETSÜI ASHIBA TETI SHITAK DANG INYAKA ARU**

**Künep Alokba'er kidanger ka ngashi meshi-i aru**

**Tetsü** : Alok! Ni tetsüng manemji nai ngashiji ana-semka agüjang. Alokbai ngashi trok agütsü.

**Tetsü** : Alok, nai ngashi tu kwi agütsü?

**Alok** : Ni ngashi trok agütsüogo

**Tetsü** : Ana-semka agüjang ta ashi nung kechiba trok agütsü?

**Alok** : Onok ongko subject nung ana asem ka (2+3+1=6) ta sayu ado

**Tetsü** : Wha!wha! ozü jabaso matu ya ...hehehe

*Ano maneni tetsüi Alokba dang yamai ashi.*

*'Ni tetsüng manemji kidang dang pongdang ka nung natzü nadi, tangar arura shiang' tetsü natzü anaba tialong nung tangar ka aruji, Alokbai tangarji kikümgang tongli, Oja nai ashi ama tangar arudar.*

**Tangar** : Tamangutsü khen khenbo angur.. Hahaha

**Alokba** : Kütsüi ashiba ni shitak inyakogo.. Hohoho

**Tetsü** : Nenabo jungnungogo, aginüla pangjara nung zükogogo.. Hahaha

**Lilir: A. Maong Aier, Alongmen ward, Mkg**

**TANÜBO NAI LANGZÜANG**

**Q:** India nunger cricket asayar shiba nem UK nung Fellowship Award agütsü?

- [A] Sachin Tendulkar [B] Ravi Shastri
- [C] M S Dhoni [D] Sunil Gavaskar

(Taruba adok nung onoki langzüksü)

**YASHIADOK TELANGZÜBA: Indore**

**Happy Birthday**

**TENÜNG : IMTITIBA IMCHEN**

Tasoba Anogo : May 11

Küm : 5

Class : A

School : Lima Aier Higher Secondary School, Dimapur

Talidak : Lingrijan, Dimapur

Arishi küm pongu tashi jabaso taküm Tsüngremer taochi nung moaja anir aruba asoshi Pa tenüng asanger. Tsüngremi jabaso taküm ajemalua tashi angaba taküm ka sūdakang aser maneni anema aliba den arishi talang moajang ta onoki sarasademtsür.

- Temeim Aya, Aba, Ayazuni & Kinüngertem



**NAIA YA METETER MA**

**FANNY CROSBY**

America tsür, Fanny Crosby-i la akümüli mapang piyong nung (arishi küm 95 tashi) Osangtajung Ken 8,000 dak tema zülu. Lai züluba nüngtugu ken aika rongnung "Tsüngrem dang sentsüwangshi süang," "Samartem kümzükang", "Ni Yisu tali nguner" aser "Yisui ajar" kentem densema lir. Fanny ya arishi hopta trok kinü tanur asüdangyongi tenük apok. Lai teti agia sarasademer sülen ang ken tasen zülu tenzük. La lanuwayongi



tamangdir ka liasü. La tanur asüdangyongi tebu asüba ajanga la tetsü tangar kidang kilir mapa inyaksüsa akum nung, anüngdangbo tetsüi (otsüla) la anepalua repranga liasü, iba yongji lai tetsü dang nungi Laishiba otsütem aser Tsüngrem indang tali meteta akum. Frances Jane van Alstyne (née Crosby) ya 1820 küm March 24 nü aso aser 1915 nü February 12 nü asü.

**SUDOKU # 3531**

7				3		9	2
		1	7	2	8		6
2			5			1	
8			9			7	
6							5
9	4			3			
3	8		1		4		5
1		6		9		4	
	2	7				8	1

**TELANGZÜBA # 3530**

6	5	7	2	8	4	9	3	1
2	1	3	6	7	9	4	8	5
4	8	9	5	3	1	6	2	7
1	3	2	4	5	8	7	9	6
5	6	8	1	9	7	2	4	3
7	9	4	3	2	6	1	5	8
3	7	6	8	4	2	5	1	9
8	2	1	9	6	5	3	7	4
9	4	5	7	1	3	8	6	2

**OJANG LUTEP # 4023**

- PMAA : □□□□
- NGKAA : □□□□□
- ÜNMAZGI : □□□□□□□
- AKINYA : □□□□□□
- TEMALIRBO : □□□□□□□□
- TIDAATNG : □□□□□□□□
- KAAI : □□□□
- NNUGI : □□□□□
- NBJEUA : □□□□□□
- ARLI : □□□□

**OJANG LUTEP TELANGZÜBA # 4022**

**NISUNGI TAJUNG DANG AGINER SAKA PEIBO SHINGA DENA JUNGA MELITETER**



Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



**Aries**  
21/3-19/4

Tanü nai mapa tajung inyaksü sentong yangluba nung takok angutsü. Anungji nai mapa tasen kar inyakdangang.



**Taurus**  
20/4-20/5

Nai teti mapa meranga inyaker. Anungji tanübo nai nü mapa nung mapang agia inyakang aser nü mapa nung na kibur kumang.



**Gemini**  
21/5-20/6

Tanü nai tangar den mapang intoktsü mejangratsü. Anungji nü kisüng jangratema kazütsü sentong yanglu tajungba asütsü.



**Cancer**  
21/6-22/7

Tanü nai kidang chiyongtsü tajung yanglutsü merangang. Nü temang anema alitsü asoshi sentong yangluang.



**Leo**  
23/7-22/8

Tanü nai kanga azüngmeyaka aser azümesena bilemstsü. Anungji nür medemer kar den otsü atonga kazütsü meranagang. Nür medemertemi na yaritsü.



**Virgo**  
23/8-22/9

Tanü nai inyakba mapa nung kar-i meinborongtsü. Nü mapa tajung maneni inyakang saka tali meinyaktsü merangang.



**Libra**  
23/9-22/10

Tanü nü dangi khuret kar arutsü süti saka nai koktetsü. Nai tamalen meinyak yutsüba mapatem kar inyaktsü merangang.



**Scorpio**  
23/10-21/11

Tanü tangari nü molungjang mereprangtsü. Anungji nai meyimba mapa kar shiemteta iba mapa nung nü mapang indokang.



**Sagittarius**  
22/11-21/12

Nai ki telung nung masü saka tema nung aliba mapatem kanga junga inyakteter aser tanü nai aji ajurutsü. Tanü nü anogo kanga tajung asütsü.



**Capricorn**  
22/12-19/1

Tanü nü mapa nung nai jangra atemtsü. Anungji pelashishia inyakang, aser nai inyakba nung sempet tajung angutsü.



**Aquarius**  
20/1-18/2


Nai o kanga jembinütsü. Saka nür medemertemi na süngjema lidaktsütsü merangtsü. Anungji nai nukjitong tasen yanglur inyaktsü merangang.



**Pisces**  
19/2-20/3

Tanü nai mapa ka nung nendaka meinyaktetsü, anungji nai mapang meindoki inyaktsü mapa shiemteta inyakang.

## GI Joe yanglutetsang, Stanley Weston süogo



**Los Angeles, May 10 (Agencies):** G.I. Joe action figure yanglutetsang, Stanley Weston, arishi kum 84 nung May 1-nü asüba osang par jala Cindy Winebaum-i osangbenertem nem metetdaksü.

Pai tenu, par chir asem aser semchir 5 ta toktsür iba lima nung bilaogo.

Weston ya 1933 kum Brooklyn nung aso aser Korean rara tembangba sülen mapang tatsüka Army nung liasü. Pa

New York-i meyipa aruba sülen advertising agency ka nung mapa ngua inyak aser iba den külemi 'New York University' nung MBA night course ka agia liasü, kong pa 'undergraduate' ka ama azüng.

Weston-i kobimelei 'licensing' aser 'merchandising industry' nung sempet aliba nguteta pa indang 'Weston Merchandising' tenzük.

'Mattel's Barbie dolls' tem 1960 kum sayaba sülen Weston-

i teburchanutem atema kazütsü yanglua ayoktsü asoshi shishilembatsü atema lenmang sadema lir ta ngutet, kechiaser iba mapang nung parnok aika Ken doll tem amshir ta ngutet.

Pai 'military action figure' tem yanglutsü apitet aser 1963 kum 'Hasbro' company dang pai ngutetba ya ayoka, koba tesülen G.I. Joe aküm. GI Joe ya otsü nung kang takok ngua aoba 'toy line' ka lir aser iba tenüng nung nungtugu TV show aser film tem yanglua lir.

Mapang tatsüka lir Weston-i pa company tenüng 'Leisure Concepts' ta melen, koba ajanga Charlie's Angels-era Farrah Fawcett, Nintendo, World Wrestling Federation aser TV show tem Alf & Welcome Back, Kotter nung amala client tem represent asü. Maneni pai ajangangtetba tongtibang rongnung kaji, 1980s nung ThunderCats show yanglutetba nung shilem agiba ya asütsü. Maneni pa 'Licensing Industry Hall of Fame'-i aiba mezünpurtem rongnung Walt Disney, George Lucas aser Jim Henson nung den züngsema liasü.

## Bollywood nung shilem agir kum 14 jungogo saka tangazüker ka ama dang bilemer: Shahid

**Mumbai, May 10 (Agencies):** Actor Shahid Kapoor, Hindi film industry nung shilem agi tenzük kum 14 jungogo saka pai ashiba agi, pai tang tashi tangazüker ka ama dang bilemer.

Arishi kum 36 tain actor-i Bollywood nung 2003 kum romantic comedy 'Ishq Vishk' nung mezüng shilem agia tenzük iba sülen nungtugu film 'Jab We Met', 'Kaminey', 'Haider' aser 'Uda Punjab' nungertem nung shilem agi. Pa actor ka

makümdang film tem nung backup tsüngsanger ama shilem agia liasü.

Rangoon actor-i Twitter ajanga pa sapurtem dang pelaba lemsatep.

"Nenok ajak dang kanga pelar. Ni jangraba aser meimaba mapa kum 14 tashi inyaka arudar. Cinema dak tajung kaji ni teti tangazüker ama dang bilemer. Ano tangazüktsü asoshi aika lir," ta Shahid-i tweed asü.

"Ajangteta aotsü asoshi ano maparen aika anungdaka lir,

saka mapang peria mali. Asüng anogo majurutsü ama kera kera inyaktsü mapang lir. Nenoki kü dak tamang akaba atema kanga pelar," ta pai zülusemstsü.

Shahid tang film yanglur Sanjay Leela Bhansali indang film 'Padmavati' tangokba nung mazüngi inyakdar. Iba film nung Ranveer Singh aser Deepika Padukone natia tongti shilem agir. Film nung Ranveer-i Alauddin Khilji shilem aser Shahid-i Rawal Ratan Singh shilem agir.


## Arishi kum 47 tain DJ Robert Miles süogo

**May 10, 2017 (Agencies):** DJ Robert Miles arishi kum 47 nung süogo. Robert Concina ya pa tenüng chichiba liasü aser pai 1990s mapang 'Children' ken atenba ajanga nungtugu aküm. Iba ken ya linük 12 nung temaba jenjang nung liasü aser iba ken ya pai 1996 kum sayaba 'Dreamland' kensep nung densema lir.

Kendener aser producer, DJ Robert Miles asüba ya anu tejangja osang mali saka DJ Mag Italia ajanga ashiba agi pa ya Ibiza, Spain nung mejangjaba tashidak ka agi asü.

"Onoki pa indang sempet kodanga mamadoktsü," ta DJ Robert Miles asüba osang sangdongdang, pa indang medemer tajung, Joe T Vannelli-i ashi.

"Sempet aika keta aliba medemer tajung asüba osang angashia kanga jashir aser sasa



bilemer," ta paisa shisem. Balearic radio station Open Lab ya DJ Robert Miles-i 2012 kum amenlok. Aser nisung aikati EDM ken rongnung 'Children' ken ya tajungtiba ta züngshir.

"R.I.P Robert Miles. Osang tamajung angashia kanga aoksar," ta Culture Club nung kentener, Boy George-ia Twitter nung zülü.

"Robert Miles iba lima nungi pilaba osang angashia kanga jashir. R.I.P #deconstruction #classichouse ken tem asoshi

kanga pelar," ta külem DJ, Pete Tong-ia zülutsü.

Amin Van Buuren-ia , "Robert Miles iba lima nungi pilaba osang angashia kanga aoksar. R.I.P," ta zülutsü.

"Robert Miles arishi kum 47 nung asüba angashia kanga aoksar...'Children' ken ya trance anthem rongnung ka lir!" ta Producer, Chris Chambers-ia zülutsü.

Miles-i kensep trok tashi saya-a lir aser pai item rongnung tesüsa sayaba kensep ji 2011 nung 'Th1rt3en' ya lir.

## TAN HOPTA ATEMA - KOMA SÜLA ?


Q. Asenok kibong shia pei peribosa züsentetsüsa ozüng agi alu yimdaktsü nunga koma süla ?

Olong 20 shi nung May 12, 2017 tashi nung iba telangzüba ya onok dangi

e-mail - tiriyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.



## Tanü nungi tenzüka Xiaomi Redmi Note 4 ayoker Asus Zenfone Go 5.5 India nung syaogo



**Mumbai, May 10 (Agencies):** India nung Xiaomi indang smartphone tekeraba nung ayokba ya Redmi Note 4 lir aser iba phone ya Flipkart aser Mi.com nung Bodhbar nungi tenzüka sen 9,000 agi ayoker.

Iba smartphone ya kanga sabua alitepba ajanga Flipkar nungbo Redmi Note 4 (Black, 32 GB aser 2 GB RAM) dang lir ta ashir. Saka Mi indang

website nungbo Note 4 ya sentsü aser tabu ajak angur.

Xiaomi Redmi Note 4 ya storage aser RAM balala nung angur. 2 GB RAM + 32 GB internal storage ya sen 9,999 agi angur, 3GB RAM + 32 GB internal storage ya sen 10,999 agi aser 4 GB RAM + 64 GB internal storage ya sen 12,999 agi angur.

Iba smartphone ya tanak, aut sentsü tamangba mesüra

hon sentsü nung angur.

2017 January nung iba Redmi Note 4 ya sayar anogo 45 nung unit million ka ayok aser iba yongji iba phone ya linük nung smartphone tekeratiba nung ayoker aküm, ta company ajanga ashir.

Redmi Note 4 smartphone indang hardware tajung aser jenjang kanga alangba yong iba phone ya aiben stock nung malir.

Iba phone indang processor ya Qualcomm Snapdragon 625 aser 5.5-inch den full HD resolution display lir.

Iba phone tesülen camera ya 13-megapixel aser tejaklen selfie camera ya 5-megapixel lir. Xiaomi Redmi Note 4 indang operating system ya Android 6.0 Marshmallow lir.



**May 10, 2017 (Agencies):** Taiwan nung technology oset balala yangluba company, Asus-i tanü India nung Zenfone Go 5.5 sen 8,499 jenjang sayaogo. Asus Zenfone series tasenba nung 5.5 inch HD IPS display keta lir aser iba nung in-built Bluelight Filter densema lir, koba ajanga phone mapang talangka amshiba mapang tamshirtem tenük asoshi teyari agütsür.

Zenfone Go 5.5 nung tesülen camera 13MP aser tejaklen camera f/2.0 aperture densema 5MP lir.

Phone nung maneni Android M den ZenUI 3.0 keta lir. Phone nung mezünyongi yangluloksema aliba 'ZenMotion' ajanga smartphone blank screen nung ojangtem ajenoktsüba ajanga 'apps' lapokba nung tamshirtem nem teyari agütsür. Ano phone nung Qualcomm 8916 Quad-core processor, Adreno 306 GPU aser 2 GB RAM den külemi battery tashi 3000mAh keta lir.

Iba phone ya Amazon India nung sentsü ana; Charcoal Black aser Sheer Gold nung angütsü.

## 2021 tashi nung India nung Online Gaming Industry Billion \$1 atongtsü

**May 10, 2017 (Agencies):** India nung tang online ajanga game asayaba industry jenjang sen million \$360 aliba ya 2021 tashi nungbo million \$1 tashi aintsü imlar, koba ainba shilem 20 alitsü, ta India nung digital gaming industry aintsü maongka aliba metetdaksüba den külemi 'Gaming In India: 2021' osang Google India aser KPMG-i agütsü.

India nung 'online games' bushiba shilem 117 agi tali akümiba ajanga 2016 tashi nung online gamer million 120 alibaji 2021 tashi nungbo million 310

tashi akümtsü.

Osang ajanga ashiba agi, 'average gamer' kati 'online entertainment wallet' asemüsü nung kabo game tem nung indoker aser game asayar shilem 25-i game tem atema sen meindoker.

India nung game asayar shilem 75 ket nung phone sen 20,000 dak tekübok jenjang phone tem amshir aser parnok rongnung shilem 50 bo külem medemertemi ajungshiba aser tetyuyba agütsüba ajanga game asayatsü asoshi ajungmesor.


India nung game asayabatem rongnung lanurtemi

game tapu balala 6 asayar. 'Casual gamer' temi puzzle game amala asayar aser game kanga asayartemi 'strategy game' tem ang tali asayar.

2017 küm online nung game bushiba noklang nung noklang renlokba nguogo aser iba nung shilem 70 bo mobile ajanga bushir.

Indian nung online gaming industry ji 'increasing localization', shidisen mamshi shishilempabatem ainba, aser smartphone tali akümiba külittem ajanga billion 1 tashi renloktüsü, ta osang ajanga metetdaksü.

## 'Elite Star' series nung Swipe ajanga smartphone tasen ana sayaogo



**Pune, May 10 (Agencies):** Swipe company ajanga 'Elite Star' series nung smartphone tasen ana sayaogo.

Iba smartphone ya tabu ana nung angütsü. Hon sentsü aketba phone nung internal memory

8GB lir, tanak aser temesüng sentsü nung aliba tabu nung internal storage ana keta lir, ta company ajanga ashi.

Elite Star series smartphone nung ya Indus Operating System lir aser iba operating system ya Android M (6.0) OS nungi yanglushiba lir. Tang phone tasen ana sayaba nung ya 4G

VoLTE amshitetter.

"Indus OS nung India nung jembiba oshi 12 tashi keta aliba ajanga iba smartphone ya nüburtemi kanga sapor," ta company ajanga sangdong.

Tanak aser temesüng sentsü

nung aliba smartphone nung 16 GB lir. Iba phone ana tesülen aliba camera ya 5MP aser tejaklen aliba ya 1.3MP lir.

"Nüburtem aika peridaksütsü aser ELITE Star smartphone ya nüburtem nüngdakba nung amshitettsü temolung nung yur yanglu. Maneni iba phone yangludang oshi-oben nung tetsükdaksü majurutsü nükjitong nung yanglu aser iba ajanga shidisen mamshi shishilempaba nung teyari agütsütsü," ta ELITE Star founder aser Swipe indang CEO, Shripal Gandhi-i ashi.

Elite Star series hon sentsü (8GB) nung aliba phone jenjang sen 3,699, tanak aser temesüng sentsü (16GB) nung aliba phone jenjang sen 3,999 agi angütsü.

## Varma-i Bruce Lee taküm otsü film ka yanglutsü sangdong

**Mumbai, May 10 (Agencies):** Shekhar Kapur-i 'Bruce Lee' indang taküm otsü film ka co-produce aser direct asütsüba osang angazükba sülen film yanglur Ram Gopal Varma-ia 'Bruce Lee' movie ka yanglutsü ta ashi. Pai nüngtugu martial art asayar aser actor ya kanga sapuba ajanga iba telemtetba agi.

Varma-i ashiba agi, pai iba film ya Kapur-i yangluba 'Little Dragon' movie sayaba mapang kasa nung sayatsü. "Ni Bruce Lee ya Tsüngrem ama külemba ajanga pa indang taküm otsü film ka yanglutsü aser Shekar Kapur indang film sayaba mapang kasa nung sayatsü," ta Hombarnü Varma-i tweet asü.

"Ni Shekhar Kapur kanga sapor aser pa anema kecha tamajung bilema mali saka Bruce Lee kanga sapuba ajanga iba telemtetba agi," ta Varma-i shisem.

Varma-i ashiba agi pai Lee indang taküm otsü film kanga junga yanglutettsü. "Shekhar



Ram Gopal Varma

Kapur alakteta kanga tajung lir saka iba film ni tajungba yanglutettsü ta bilemer," ta pai tweet asü.

Varma-isa ashiba agi, pai Bruce Lee'er jala Shannon Lee, aser pa kinungtsü Linda Lee ya Kapur kanga agi tajungba meteta lir.

Kasa mapang nung Little Dragon film ya 1950 mapang Hong Kong nung loktiliba aser yimsüsüba ren nung tashi balala ajanga Bruce Lee ajak dang nungi nüngtugutiba martial art asayar aser tanü astüng tensa 'philosopher' ka kümetdaksüba nung ajemdaker yanglub film ka asütsü, ta osang ka ajanga Hombarnü metetdaksü.

## Kisüng mapa inyaker asoshi 'red alarm' aketba phone sayaogo

**May 10, 2017 (Agencies):** Lokdi tenzüker aser ki asür amala kisüng mapa inyaker asoshi Sweden nung aliba Doro company ajanga 'alarm button' aketba phone ka sayuogo.

Doro 8020X nung 'call for help' button ka keta lir. Iba button nung anemba ajanga iba phone amshir aliba tesem tejangja densema text message pongu khen nungi yoktettsü.

Iba mesükba ya tanga mobile nung amshitsü asoshi application balala yangluteta lir saka tang tasen yangluteta aliba phone nung 'home button' masü saka phone tezülen inokja aliba ajanga iba feature ya tajungba lir.

Doro 8020X ya UK nung sen £220 agi angur aser iba phone ya tensa balala nungi kümzüka litettsüsa yanglua lir.

Doro indang automated care centre aser i-care nem küm ka asoshi sen £40 agütsüba yong i-care ajanga iba phone inyaksangshi züngzünga repranger.

Phone kibur junga ali-mali metettsü asoshi i-care ajanga message mapang shia yoker.

"Tang tashi nung Doro ajanga nisung taintem asoshi handset yanglua aliba amshir züngsem 130,000 lir," ta UK aser Ireland nung Doro managing director, Chris Millington-i ashi.



MUMBAI, MAY 10: Bodhbarnü, Mumbai nung Bollywood actress, Madhuri Dixit den la kinüngbo Shriram Nene (abelen) aser Videocon d2h nung Head Marketing, Sugato Banerji (achichi) nungertemi Videocon d2h indang value added service tasen, d2h Nachle sayaba mapang tangokba noksa nung angur.





Srinagar (Jammu & Kashmir), May 10, 2017: Mongolbar aonung telungpurtemi puer oa tepsetsang Lieutenant Umar Fayaz Parray tasumang Kulgam district kubok par yim dak, Sudsan nung aremstsü lia tanü army ketdangsertemi naru yuja akhüm agütsüba noksa nung angur.

### Prangpong mebeni alir sepai tepsetbaji tasumait mapa ka lir: Jaitley

**New Delhi/Srinagar, May 10 (Agencies):** Bodhbarnü Union Finance Minister Minister, Arun Jaitley-i, tanep south Kashmir, Shopian district nung kiralongrartemi tepsetsang, Lieutenant Umar Fayaz ya tatishitsü agir ka asütsü aser pa ajanga Kashmir nung lanur aika ajungmesotsü, ta ashi.

Arishi küm 23 lanur, Lieutenant Fayaz ya 2016 küm Army nung dena liasü aser pa par kinünger ka kiyimba sentong nung adentsü atema tang mezüing sodi meshir Shopian district-i oa liasü.

Yasüing pa Kulgam jila nung kinünger ka kidang lia telungpur parnok pongu shii puer ao, aser tanep Shopian district anasa pa

mang nung injang zübo aika keter tasumang angu. Defence & finance ministries incharge, Jaitley-isa, "Lt. Umar Fayaz'er kinüngertem den onoki tejashi aser mangyim lemsateper. Pa ajanga Kashmir nung lanurtem maneni ajungmesotsü," ta ashi.

Jaitley-isa, kiralongrartemi lanur Army ketdangser ka tepsetbaji tasumait mapa ka lir, ta aitsü.

"2 Rajputana Rifles nungi Umar Fayaz ya saisapong nung takoktet ka liasü, pai linük atema taküm tenla agütsüba ajanga linüki Kashmir nung kiralongrartem samatsütsü atema temelungtetba tanela sayur. J&K nung lanur ketdangser ya tatishitsü sayur ka

liasü," ta ashi.

Ano külen Minister of State (Home) Hansraj Ahir-i, iba tatalokba bushisüngdangtsü atema tuyuogo, ta metetdaksü.

Ano Srinagar nungi tanga osang ka nung, Bodhbarnü longkak aitertemi Fayaz asüpila sentong nunga timtem agüja liasü. Iba dak alia pa tasumang bener jajaba mapang nunga injang ola angashia liasü.

Tamalen state police-i sepaitem dang, tensa mesüngjem tashibo south Kashmir-i sodi maotsü tekümdangtsü metetdakja lir.

Tang south Kashmir kubok Pulwama, Shopian, Anantnag aser Kulgam district tem nung tensa kanga mejungi lir.

### Pak nung Jadhav taküm lendong nung lia India-i ICJ teyari meshi

**New Delhi, May 10 (Agencies):** Pakistan nunger ket nung Indian Navy officer, Kulbhushan Jadhav taküm lendong nung lia India-i International Court of Justice (ICJ) dang nungi teyari meshitsü lemtet, ta tanü External Affairs Ministry-i metetdaksü.

Itangiter mapa inyakba ken o nung aija Pakistan nung court kati pa nem tasüba temerenshi agütsütsü obendang agüja lir.

External Affairs Ministry otongdar, Gopal Baglay-i, iba

onük nung o lemtepa sülen iba telemteba agiogo, ta metetdaksü.

Jadhav ajurutsü atema India-i Pakistan dang 16 ben tashi mepishia liasü, saka tang tashi Pakistan tsütsülen nungi kecha telangzüba mali.

Iba dak alia India-i Jadhav ken o dak sendakba kakettem Pakistan dang meshi, saka iba atemajia telangzüba mali.

Jadhav nem tasüba temerenshi agütsütsü obendang agütsüba court, Pakistan military

court anema Jadhav'er kinüngertemi mepishiba nunga telangzüba magütsür.

Kulbhushan Jadhav ken o dak sendakba nung India-i ICJ dang teyari meshiba sülen Iran linüki pa ajurutsü atema Pakistan dang mepishio.

MEA otongdar, Baglay-isa, April 27 nü External Affairs Minister, Sushma Swaraj-i shidi ka ajanga Pakistan Foreign Affairs Adviser, Sartaj Aziz dang Jadhav'er kibong nem visa agütsütsü mepishia lir, ta ashi.

### TanüAAP-iEVMonük nung longkak aittsü

**New Delhi, May 10 (Agencies):** Asüing, Brihostibarnü Aam Aadmi Party (AAP)-i Election Commission office kima longkak aita, taruba election nungibo VVPAT aliba voting machines amshitsü atema takhangba agütsütsü, ta osang ka ajanga metetdaksü.

Election Commission-i, EVM ji raksaa amshitsü makok ta jembiba anema AAP-i, yashi Delhi Assembly nung party MLA, Saurabh Bhardwaj-i, EVM ji raksaa amshitetsü akok ta kuli sayuogo, ta ashi.

Party-i, asüing anüngdang 11:00 ako nungi Delhi MLA tem aser lenir taintemi 'Save Democracy Movement' omen nung ajemdaker Election Commission office kima longkak aittsü, ta metetdaksü.

Osangbenertem senden nung AAP Delhi convenor, Gopal Rai-i, May 12, 2017 nü Election Commission-i party ajak ayongba senden nung party-i shilem agia adentsü, aser iba nungji ajemdaker mera kar agütsü, ta metetdaksü.

Rai-isa, "Commission-i, yashi onoki (AAP) EVM shidakba masü saka taila ka amshi, ta telangzüba agütsüogo. Onoki EC dang EVM hackathon ka ayongtsü jazüker. Iba mapang nungji

onoki parnok (EC) indang machine ji koma raksaa amshitsü'ar sayutsü," ta ashi. AAP-i voter-verifiable paper audit trail (VVPAT) keta aliba EVMs amshitsü atema takhangba agütsüba den külemi EC dang EVMs nung register süa aliba votes aser mashi-mashi shimba booth nung paper trails shilem 25 ji kasa asütsüla ta akhangtsü, ta paisa ashi.

VVPAT keta aliba EVMs ya, gol nungi shidi ka alua vote agütsür kati pai shimba candidate dangi vote shidak ao asü mao'ar jangjatsü atema gol ka lir.

Yashi Delhi Assembly nung Bhardwaj-i, voting machine nungji 'secret code' ka inokba ajanga aji raksaa amshitetsü akok, ta metetdakja liasü.

AAP MLA-isa, "Democracy nung tamang akaba machine ji koma raksaa amshitetsü'ar ni sayudi. Ni ama tongmelang engineer kati-a anogo 10-15 dang meranga inyak nunga pei aginüba party mesüra candidate-i vote angütsü atema EVM 'hack' süteter," ta ashi.

Bharadwaj-i, "EVMs nung aliba codes amshia ibaji raksaa amshitetsü akok. Koba button nung nemdir nemaka nai aginüba candidate dangi vote ji aotsü," ta shia liasü.



Lucknow, May 10, 2017: Bodhbarnü Lucknow nung aianu ana tepsetba ken o dak sendakba nung Lucknow SSP, Deepak Kumar-i osangbenertem den jembiba noksa nung angur.

**DIMAPUR WATSÜ TELONGJEM**  
33 Buba Lokti Senden

Anogo : 13<sup>th</sup> May 2017  
Mapang : 10 Ajo nungi  
Tesentepdak : Sakus Mission College (SMC) Landmark

**KETDANGPURTEM**

1. Tir : Wt. Alila Wai Jamir (Khar)
2. Tatong Tir : Wt. Chubala Lemtur (Kangtsüing)
3. Tongti zülur : Wt. Aoinla Jamir (Mongsenyimti)
4. Repsem zülur : Wt. Yarsangla (Mopungchuket)
5. Sen zülur : Wt. Limala Imchen (Mangmetong)
6. Kimen : Wt. Chubala (Changdang)
7. Legal Advisor : Wb. N.Y. Temjen Lemtur (Mopungchuki)

**SENTONG**

1. Sentong anir : Mendenpurtem
2. Telok Ken : Watsü Anthem
3. Lai zünga sarasadem : Rev S. Awala Lkr., Deacon, DABA
4. Tetsü Tebo Ken : Akhoyatsür Telongjem, Tayonger Mendenpurtem
5. Tayongzükha O : Wt. Arenla Aier, Tir, N'WHD (7mts)
6. Temeja Ken ka : Molungkimongtsür Telongjem, Tayonger Mendenpurtem
7. "Terenemtet Tetsür" : Wb. Akok Walling Principal Govt. College Dimapur (25mts)
8. Sarasadem : Wt. Imtila

**SÜNGO AJEMBA MAPANG**

**Business Hour**

1. Osangtem agütsü : 1. Tongti zülur Osang  
2. Sen Osang  
3. Nominating Committee Osang
2. Osangtem nungi O lemtepa mapang
3. Menden moletepa mapang : Wt. B. Amongla
4. Menden tatem O
5. Tatem Sarasadem : Telok

**METETDAKTSÜR**

1. Tebilemba (Agenda) lira senden metenzükdang ketdangpur ket tongjangma.
2. Watsülar ajaki asen Aotsür sübütsü meraketa sobur arutsü mepishir.
3. Sentong takok asosii ajaki sarasadema atadi.



# North Korea-i aotsü mulunga lir : South Korea Tir Moon



Bodbarnü Seoul nung aliba National Assembly nung South Korea President Moon Jae-in aser pa kinungtsu Kim Jung-suk nati linük wako nem tetushi agütsüdang agiba noksa angur. (Seoul, May 10)

**Seoul, May 10 (Agencies):** South Korea nung Tir tasenbai tenangzükba agiba sülen North Korea semdangtsü mulunga lir ta ashi.

Moon Jae-In ya taoba mapang human rights lawyer ka liasü aser pai North Korea den yimjung atema olemteptsü tebilemba pusema nungiter, ta metetdaksüogo.

"Nüngdak dang süra ni

Washington-i oa jembitsü. Tima ta dang süra ni Beijing aser Tokyo aser Pyongyang-ia aotsü" ta Seoul nung National Assembly building nung Moon-i ashi.

Moon-i North Korea den tesentaktep yanglutsü atema mapa inyakba nung timtem kanga ajurutsü kechiyong North Korea-i nuclear tashi amshia United States amaktsü ta ashir

aser ano South Korea tsütsü artillery forces amenoka lir.

Kasa mapang nung South Korea-i China den US missile defence atema ashishitep ken o ka adoka lir aser Japan den raraba putiotsü mangatettep ka lir.

Moon-i Prime Minister inyaktsü atema taoba mapang osangbener aser yimten yimsüsür Lee Nak-Yon shimogo aser National Intelligence Service tanishir inyaktsü atema Suh Hoon shim. 2000 aser 2007 nung inter- Korea summit anaben aliba nung Suh Hoon-i tongti shilem agia liasü.

Tanü Moon-i Tir inyaktsü atema tenangzükba magidang taoba tir Park Geun-Hye'er Liberty Korea party züngsemtem den ajurutep aser parnok teyari meshi.

"Ni nisung ajak indang Tir asütsü aser ni pusema menungiter tema tenzüktsü" ta Moon-i ashi.

Yashi South Korea Tir election nung Moon-i vote noklang nung shilem 41.1 angu. Park'er Liberty Korea party nungi Hong Joon-Pyo-i shilem 24.0 aser Ahn Cheol-Soo-i shilem 21.4 ngua liasü.

## Trump-i FBI Director mapa nungi anentsü

**Washington, May 10 (Agencies):** US President Donald Trump-i nisung aika süngmangdakja Bodbarnü FBI Director, James Comey mapa nungi anentsüogo.

US attorney-general Jeff Sessions aser pa den yariteper Rod Rosenstein nati ashiba nung ajemdaker Trump-i Comey mapa nungi anentsür, ta White House-i tanü metetdaksü.

Trump-i presidential campaign nung Russia den tesentaktep liasü ta tai tonglokba ken o ka Comey tekolak sür bushisüngdanga arur.

Tir election agiba küm nung Hillary Clinton dak sendakba e-mail ken o nung ajemdaker US Tir Trump-i Comey mapa nungi anentsür ta osang metetdaksü.

Taoba US Tir Barack Obama kübok Hillary-i US Secretary of State inyakdang private email server amshiba ken o atema nisung aikati arishi küm 56 tain Comey aija aru.

## Office of the TZÜWAR KIDONG UNGMA IMPANG

H.Q: Ungma, Mokokchung

### TENÜNGSANG AGÜTSÜR



Wb. L. Pangjung Jamir aser Achila Lkr. Ungma, jabaso **Wb. Okten Jamir**, Queen Mary Higher Secondary School, Mokokchung nungi HSLC 2017 result sangdongba nung marks 563 (93.33%) ajangzükta top 20 jenjang nguteta konang nungsang tulu bener arutsü nung Tzüwar kidongi pelar aser tarutsü anogotem nung nü taküm shisatsü aser nü wadang nübur asoshi südakjangma.

Sd/-  
**Imtidongba Jamir Tatar**  
Ungma Impang

Sd/-  
**R. Nungshilepden Jamir Tatar**  
Ungma Impang

## OFFICE OF THE AO STUDENTS' UNION KOHIMA

### TENÜNGSANG AGÜTSÜR

Taküm küm 2017 HSLC & HSSLC tatidang nung Ao Kaketshir Telongjem Kohima züngsem rongnungi ajak dang alakteta takok angur item nem tenüngsang tulu agütsür:

1. **Moamanen Jamir** (Changtongya) HSLC TOP-10 (a) S/o. Shilutemjen.
2. **Temjeninla Jamir** (Mongsenyimti) HSLC TOP-16 (d) D/o. I. Meyionen Jamir.

Tsürabur, tesayur aser teyariteper shirnoksa item takok jenjang tongtetdaksüogo, nenok ajak dang AKTK-i kangasa pelaba lemsateper. Iba den külemi Aor Kaketshirtem shirnoksa HSLC & HSSLC 2017 nung takok nguogo, nenok ajak nem tenüngsang tulu agütsür aser tarutsü nunga nenok wadang nung takok ngudakjang ta AKTK sarasadem.

Sd/-  
**Tiarenba Jamir**  
President

Sd/-  
**Temsujongba Imchen**  
General Secretary

## GOVERNMENT OF NAGALAND DIFECTORATE OF TECHNICAL EDUCATION NAGALAND : KOHIMA

Dt. Kohima, the 10th May, 2017.

### NOTIFICATION

NO. DTE/ ESTT-2/3/20 16- 1 7 : Candidates who have applied for undergoing 3 (three) years Diploma courses outside the State during 2017-18 session and not submitted their HSLC marksheet and HSSLC marksheet in respect of candidate who opted for Diploma Pharmacy and Hotel Management & Catering Technology are hereby directed to submit their HSLC and HSSLC marksheet to the office of the undersigned on or before 25th May 2017. Failing which, their candidature for selection will not be considered.

Sd/-  
**(ER. ARJUN SINGH)**  
Director.

Issued by: DIPR

## OFFICE OF THE DIMAPUR YAONGYIMSEN IMSONGER IMLIJUNG SEMCHIR ELANGTSÜR TELONGJEM

### TENÜNGSANG AGÜTSÜR

Mr. & Mrs. Nungsangkaba Imsonger jala **Kr. Limayangla Imsong** NPSC tatidang nung Post Graduate Teacher (PGT) Class-II Gazetee under school education department nung takok ngua sensosanger ajak nem tenüngsang tajung bener arutsüba asoshi kanga pelar, maneni ne sempet taung den arishi talang moajangma ta sarasademtsür.

Sd/- **LIMANENLA**  
President

## WAROMUNG SHISALIOK TRUST (Sponsored by Waromung Officers Telongjem) FELICITATION

Taküm 2017 HSLC tatidang nung asen Aor Aotsür shirsa takok tajung nguogo, Waromung Shisaliok Trust (WSLT) ajanga nenok ajak nem akhüm tetushi agütsür. Talisa, Waromung shisashir kar danga HSLC 2017 nung Top 20 aser Subject topper ngua lira, WSLT award agütsütsü atema admit card aser mark sheet (Photo copy) WSLT office bearers ket tekaraba nung tongtsütsü mepishia metetdaksür.

Sd/-  
**Dr. Temjenmenla**  
Secy. (WSLT)

Sd/-  
**Dr.L.Tongpang Longkumer**  
President (WSLT)



## OFFICE OF THE DIMAPUR WAROMUNG SENSO TEIONGJEM Dimapur : Nagaland

### SANGDONGER

Waromung chir, aser senso- Dimapur, yimtiba aser jila balala nungi arua Dimapur aser temeküt nung asen sobaliba dak mapet mapa tamajung inyaka yim tenüng menüktsüir, Dimapur Waromung Senso Telongjem Ozüng No. 11 nung melaba ama tapet agi merenshitsü.

Waromung chir aser senso shibasa Dimapur jila nungi arua Hostels, Paying Guests aser para ki (rented house) etc. nung kaket shisatsü bushir, training agir aser mapa inyaker ajak DWST Ozüng No. 1 nung shia aliba ama pei tenüng, talidak jaka aser tongtepratep number etc. tejangja DWST Ketdangpur ket anogo 30 tashi nung tongtsütsüla. Iba tetuyuba shibai mangalir DWST tapet mapa inyaktsü.

Sd/-  
**CHUBAKUMBA**  
TIR.

Sd/-  
**Imli Lkr,**  
Tongti Zulur

## YAONGYIMSEN KAKETSHIR TELONGJEM

**Workshop on career opportunities  
- current trends cum spiritual awakening**

DATE :  
11th - 13th May 2017



VENUE :  
Generation Countdown  
Youth Ministry Centre (GCYM),  
Sovima, Dimapur, Nagaland.

### RESOURCE PERSONS

1. Mr. Alemtemshi Jamir, IAS (Retd) Former Chief Secretary, Govt. of Nagaland
2. Ms. Rozelle Mero, People's channel, Dimapur.
3. Mr. K. Nakhro, Deputy Secretary, NPSC, Kohima.
4. Mr. Nishit.
5. Mr. Lezo Putsure, Director, Youth net, Kohima.
6. Dr. Yan Murry, Chief Executive, Pinnacle Skills, Dimapur.
7. Er. Lanuwabang Lemtur, Director, NIELIT, Kohima.

### SPIRITUAL AWAKENING SPEAKER :

Mr. K. Anung Imsong, Pastor.  
Medziphema Town Ao Baptist Church.

### TEMETETTSÜ

- \* I ba sentong nung Yaongyimsen Kaketshirtem Class 10 nungi tema ajak arua adentsü pelashishia jaoker.
- \* I ba sentong nung adentsü purtem ajak 11th May, 2017 nikongdang 3:00 ako tashi nungbo tesentepdak GCYM, Sovima atongtsü metetdaksür.
- \* 11th May, 2017 aonung sentep sentong nung 6:00 ako nungi tenzüktsü.



Mkg nung LDA/Bench/Asstt/  
Steno tatidang May 27 nü agitsü  
**Dimapur, May 10 (TYO):**  
Mokokchung nung LDA-Cum-  
Computer Assistant/Bench  
Assistant/ Steno indang tatidang  
May 27, 2017 nü agitsü.

Tatidangji Queen Mary Higher  
Secondary School, Mokokchung  
nung anepdang 10:00 ako nungi  
nikongdang 4:00 ako tashi agitsü.

Iba tatidang agütsüsü atema  
tenüing agüja alirtem ajaki  
examination fee sen 180 agütsür  
Admit Card agizüksü  
metetdaksügo.

Admit Card ji Establishment  
branch, Deputy Commissioner's  
office, Mokokchung nung May 10  
nungi 20, 2017 tsüingda anepdang  
11:00 ako nungi nikongdang 3:00  
ako tsüingda angutsü.

## NE nung nüjiso ...

(TAPAK 1 NUNGI...)

"Taintemi tanurtem anepalutsüla  
aser kümzüka ayutsüla sürnung  
aiben taintemi ang tanurtem dak  
tashiyim mapa inyaker. Tetsür  
tanurtem dak tim mesüi kongshiba,  
tashiyim agi shi nung medemba aser  
tanga onük aika asen loktiliba nung  
ataloker saka tenüing menüksü  
tsübuba ajanga item tatalokbatem  
miimbanger," ta Ela-isa  
metetdaksü.

Kidang kilir inyaksü atema  
tanurtem ayuba aija Ela-isa, "iba ya  
meimchir temeden anema inyakba  
mapa ka lir. Parnok nem kakat  
shisatsü agütsüsü tenüing nung  
kilitüsü ayubaji meimchir temeden  
anema aser nisung shibelenba  
inyakyim den kasa lir" ta ashi.

Tanü sentong nung MLA Dr.  
Longri-i Naga Peoples Movement  
for Human Rights (NPMHR)  
indang otsü aser pai iba nung  
inyaka aruba indang osang  
metetdaksü.

Iba shisatokden sentong ya  
Naga Peoples Movement for  
Human Rights (NPMHR)-i  
ayongzüka agi.

### E-Tender Notice No. 08 of 2017 Date : 09-05-2017

Item mapatem asoshi ajak nungi  
e-tender meshir aser ibaji 13-6-2017  
nikongdang 15:30 nung lapoktsü. Iba  
atema teka agi zülür bener aruba magir  
aser iba amaji agizükra odang toktsüsü.

1) Tender No.: GHY102017,  
Name of work & Location: (I)  
Improvement of cess at Km 395/3 -  
396/3, Km 1/0 - 2/4, Km 4/5 - 5/7 and  
Km 6/5 - 7/8. (II) Widening of cess at  
KYQ yard shunting line at KM 1/5 to  
2/4. Tender value: ₹ 60,60,991.51,  
Earnest Money: ₹ 1,21,220/-.  
Completion Period: 180 days. Date  
of closing of tender: 12-06-2017  
at 15:00 hrs.

2) Tender No.: GHY112017,  
Name of work & Location: Supply  
of AT weld (with single shot crucible  
and automatic thimble technology)  
by SKV process under the  
jurisdiction of ADEN/Track/GHY.  
Tender value: ₹ 1,36,78,148/-,  
Earnest Money: ₹ 2,18,400/-.  
Completion Period: 270 days. Date  
of closing of tender: 12-06-2017  
at 13:00 hrs.

3) Tender No.: GHY122017,  
Name of work & Location: At  
Guwahati:- Improvement of existing  
platform surface of PF - 2 and 3.  
Tender value: ₹ 1,48,42,440.69,  
Earnest Money: ₹ 2,24,220/-.  
Completion Period: 120 days. Date  
of closing of tender: 12-06-2017  
at 13:00 hrs.

For details please visit  
[www.ireps.gov.in](http://www.ireps.gov.in)

Sr. Divisional Engineer/C,  
Maligaon  
NORTHEAST FRONTIER RAILWAY  
"Serving Customers with a smile"

## OFFICE OF THE MONGSENYIMTI STUDENTS' UNIT KOHIMA TENÜNGSANG AGÜTSÜR



MSUK kaketshirtem rongnungi  
**Kr. Temjeninla Jamir**, Mr. I. Meyionen  
Jamir aser Mrs. Ajungla Lonkumer jala-  
i 2017 HSCL tatidang Northfield  
School, Khikha nung-i Top 16 jenjang  
den Mathematics subject nung 100%  
marks nguteta konang nüingsang tulu  
bentsür arunung Mongsenyimti  
Students' Union Kohima (MSUK)  
züngsem mulungjang ajak nung  
mesemi pelaba iba osang ajanga  
metetdaksür.

Iba den külemi ano HSLC, HSSLC  
aser tatidang balala nung shirnokisa takok aser konang  
nüingsang tulu ngutetogo, nenok ajak nem Mongsenyimti  
Students' Unit Kohima ajanga tenüingsang aser tetushi agütsür.

Sd/-  
**Alemsunep Ozüküm**  
President, MSUK

Sd/-  
**Arisenla Pongen**  
Gen. Secretary, MSUK

## TENÜNGSANG ASER TETUSHI AGÜTSÜR

Changtongya Union aser Fellowship, Mokokchung Town  
nübürtem ajaki teküpboklen agüja aliba lenirtem aser chirnurtem  
dang nenoki meranga aser nendaka inyakba aser nenok sempet  
tajung ajanga lenla balala nung takok aser temaba jenjang  
tongtet nung, nenok nem tenüingsang tetushi tulu agütsür aser  
Tsüingrem tenüing asanger.

1. Mrs. S. Arenla Lkr, Principal, FAC, Mkg.
2. Er. Takoyangba Lkr, S.E PWD (R&B) Mkg.
3. Ms. Limasenla Y. Jamir, D/o Rev. O. Yashi & Satemla,  
Asst. Professor, Physics (CI-I Gazetted)
4. Mr. Imkongwati Lkr, S/o Takanungba & Sakonenla,  
President AKM
5. MR. Moamanen Jamir, S/o Shilutemjen & Imlisenla,  
HSLC Top -10 (A)

Ano HSLC aser HSSLC exam nung takok angur ajak dang  
pelaba metetdaksür. Nenok taküm, wadang aser lenisüba nung  
nübürtem tejakleni aniangma ta sarasademtsür.

Sd/-  
**Tsuknungtoba**  
President  
CTN. Union, Mkg

Sd/-  
**Tiasola Lkr**  
CTN. Fellowship, Mkg

## Office of the Longmisa Senso Mungdang TENÜNGSANG AGÜTSÜR

Longmisa Senso Mungdang ajanga sensosanger shirnoki  
wadang balala nung takok tajung ajangzüktetogo, nenok den  
tepela konang nüingsang iba paper ajanga lemsateper.

- i. Smti. Kikumsungla Jamir, D/o Nungdoksashi Jamir,  
lai sorkar tenzükbba wadang nung ADC jenjang ajangzüük.
- ii. Ms. Imolemla Lemtur D/o Limabenden Lemtur, lai NPSC  
ajanga agiba tatidang nung Post Graduate Teacher,  
Political Science (Class-II Gazetted) nung takok angu.

Iba den külemi HSLC aser HSSLC 2017 tatidang nung takok  
angur ajak den pelaba lemsateper. Nenok tenzükbba wadang  
aser shisaliok bushiba nung ano maneni Tsüingremi moajang  
ta asen sensosanger sarasadem.

Sd/-  
**Merensosang**  
Mendenbuba

Sd/-  
**Alemchuba**  
Repsem Zülür



## OFFICE OF THE UNGMA SENSO MUNGDANG UNGMA, MOKOKCHUNG, NAGALAND.

### TENÜNGSANG TETUSHI AGÜTSÜR

Ungma senso rongnungi shirnokisa takok tulu ngua jenjang  
tajung tongteta konang bener arutsügo, mungdangi nenok ajak  
nem tenüingsang tetushi tulu agutsür.

1. Supongmenla Jamir D/o. Tinukumzuk Jamir  
Lecturer (Mathematics) SCERT- through NPSC 2017.
2. Oktem Jamir S/o. L Pangjung Jamir (Queen Mary Higher  
Secondary School, Mokokchung) Ranked 20th HSLC 2017.
3. Subject Topper (Ao)
  - I. Takumpoba S/o. Late. Nungsangmeren Imsong.  
Mount Moriah School, Ungma.
  - II. Rongsenkala D/o. Noklentoshi Lkr.  
Mount Moriah School, Ungma.
  - III. Teyongmenla D/o. Imchatiba Jamir.  
Mount Moriah School, Ungma.

Tsüingremi nenok ajak maneni moajangma.  
Sd/-  
**(TAKOYANGER TATAR)**  
PRESIDENT

Sd/-  
**(DR. RONGSENSUSANG)**  
GENERAL SECRETARY

## KIBONG KÜMER KÜM TENEMSÜRTEKU BUBA DEN INDIAN ARMY NUNG PENSION NGUR KÜM TENEM ABENSABA JUBILEE 11<sup>TH</sup> MAY 1967 NUNGI 11<sup>TH</sup> MAY 2017



**MR. IMNUKMEREN (EX. HAV. 1<sup>ST</sup> ASSAM REGIMENT)**  
ASER

**MRS. TATONGKALAMANGMETONG**

Oja, Oba, nena kibong kümer küm tenemsür teku buba  
aser sorkar mapa nungi Pension ngur küm tenem abensaba  
tepela anogo mongtettsüsa arishi anema yutsüba atema  
Tsüingrem tenüing asanger.

Nena nungi jakzükbba chirnur, semchisemnur aser  
anükapangtem ajaki tanü nena nem aküm tetushi tulu agütsür.  
Tsüingremi ojala aser obala nena nem maneni arishi talang  
moajangma ta onok sarasadem. **AMEN.**

## Molungnen O



ASO :  
15.5.1932

ASÜ :  
5.5.2017

Onoki teti meima aliba tsürapur tajung Asür **Chungpongtemjen**  
(UNGMA) ajungbena iba lima toktsür onok nüktzü agi ananger  
shisa ramaa alidang, arogo nung tenzükertertem aser merataket  
yimten yimsüsürtemi anir kiyong kidangertem, pur medemertertem,  
jila balala nungi sarasadem, rongsen, nübo agi onok alashia  
medoktsüi yaritepba asoshi pelar. Onoki nenok tonga arua pelaba  
meshitba asoshi sasar, saka iba zülü ajanga nenok ajak dang  
kanga pelar ta lemsateper.

Asen takar Tsüingremi nenok taküm aser mapa tajung maneni  
moajangma. Amen

- Chirnurtem, Semchirtem aser Puinertem.

## Achila Memorial Rashtra Bhasha Hindi Institute

(Affiliated to Rashtra Bhasha prachar Samiti Wardha)  
Near Children School,  
Aongza Ward, Mokokchung - 798601

### 2017-2018 ATEMA ADMISSION LAPOKER

Teküpboklen agüja aliba Hindi course-tem asoshi admission  
11-05-2017 nungi 26-05-2017 tashi alitsü. Anungji Hindi azüngtsü  
jangrartemi arua admission agitsü metetdaksür.

**Tongtepratepdak: 8732013211**

- Course-tem :
1. Prathamik & Prarambhik - 6 months
  2. Pravesh - 6 months
  3. Parichay - 1 year
  4. Kovid - 1 year
  5. Ratna - 2 years

## Office of the Mokokchung Town Khensa Senso Telongjem TENÜNGSANG AGÜTSÜR

MTKST ajanga **Dr. R. Bendangtemjen** S/o Mr. & Mrs.  
C. Rema Ao, Doctor of Philosophy Geography Topic: "Rural  
Resource Marketing and the Role of Transport Network in  
Mokokchung District, Nagaland" Nagaland University, Lumami  
aser pa kinüngtsü **Dr. Imchalemla**, D/o Er & Mrs. S. Meren  
Walling, Doctor of Philosophy Horticulture Topic "Studies of  
Integrated Nutrient Management and Storage of Bulbs in Lilium  
var. Brindisi" Nagaland University, Medziphema, Dr. Sangyu  
Yaden aser Dr. Pauline Alila, tena acha-ayang aser teyari kübok  
senso sanger nem konang aser takok tulu bener arutsüba atema  
kija aser lokti ajaki tenüingsang tetushi agütsüba metetdaksür.

Tarutsü nunga nenok wadang aser mapa nung Tsüingrem  
temoatsü aser azükaru lidakjangma ta ajaki sarasademtsür.

Sd/-  
**Mr. Wapangtemjen**  
President



### Madrid Masters nung Andy Murray round asembubai iogo



**Madrid, May 10 (Agencies):** World No 1, Andy Murray-i Madrid Masters nung Romania nung Marius Copil den Mongulbarnü asayaba nung Murray-i 6-4, 6-3 agi koka tasembuba round-i iogo.

Taoba küm tatemlen Murray ya temaba jenjang tongtetba sülen temang mejungi aser pa asaya mejungi aru.

Ajisüaka Scotland nung

Murray-i kanga junga asayaa World No 104 nung alisang, Marius madak minute 90 nung takok angu.

"Iba asayamong nung takok angutsü asoshi ano mapang lir. Ni junga masayateter amai ni bilemer," ta Murray-i iba asaya temer osangbener den jembidang ashi.

"Ni service junga agütsütetra kü asaya iba den kasa aoer.

Ibaji ni asayaba nung tongtipang shilem ka lir aser kü indang service tajungba akümba ngua ni pelar," ta paisa shisem.

Brehostibarnü last 16 asaya nung pai France nung Herbert mesüra Croatia nung Borna Coric den asayatsü.

Taoba ita Barcelona nung Murray akoksang, Dominic Thiem-ia America nung Jared Donaldson madak 6-3, 6-4 agi akok.

World No 9, David Goffin-i Germany nung Florian Mayer madak 7-6 (7/3), 6-0 agi kokteta asembuba round-i pa mezüngbuba ai.

Tanabuba jenjang nung alisang, Novak Djokovic-i Spain nung Nicolas Almagro den asayatsü. Nicolas-i par kasa lisbur, Tommy Robredo madak 6-3, 3-6, 6-1 agi takok ngua liasü.

Rafael Nadal-i Italy nung Fabio Fognini den Bodhbarnü asayatsü.

### Manchester Utd-i Pogba alizükba maparen FIFA-i bushisüngdang

**Manama, May 10 (Agencies):** Alima nung otsüsüa Paul Pogba-i Manchester United nung adenba inyakyim FIFA-i bushisüngdang asütsü tenzükogo.

August 2016 nung Manchester United-i French midfielder Pogba ya Italy nung club Juventus nungi £89.3 million (\$111 million, 105.2 million euros) agi alizük.

Ajisüaka, FIFA-i iba transfer inyakyim nung koba onük atema bushisüngdang

asür'ar osang memetdaksüi lir.

Arishi küm 24 tain Pogba ya mezüng Manchester United Club atema asayatsü tenzük, saka Premier League nung asaya asem dang asayaba sülen pa Juventus nung aden.

Italy club Juventus nung adendang 2012 aser 2016 tsüngda Serie A nung parnoki league sempet 4 tashi agizüka liasü.

Pogba-isa 2015 Champions League final nunga asaya aser

idanggi Juventus-i goal 3-1 agi Barcelona den tamakok angu.

Pogba ya 2014 French World Cup telok nung züngsem aser best young player sempet angu.

2016 European Championship nung Pogba-i kanga junga asayaba ajanga Manchester United manager Jose Mourinho-i pa saklok aser hopta ishika transfer indang maparen inyaktepba sülen, yaküm August ita Pogba-i Manchester United nung aden.

### NPF central team-i anir Mkg...

(TAPAK 1 NUNGI)



Chuchuyimlang yimdak telungjem senden ka mener külen NPF Working President & Advisor to CM Huska Yepthomi den party ketdangsurtem külemi noksa nung angur. Mokokchung, May 10, 2017

Paisa taoba Nagaland CM aser tang MP teinyakdak Neiphu Rio mapa aitsüdang, cabinet menden atatsü teimla nung pa MP election nung toktep saka kecha mata, anungji, pai tanaben state-i arua T.R Zeliangi aniba sorkar raksatsüsü aiben merangogo, saka Tsüngremi ibaji mataloktsü, kechiyong "nübur olaji Tsüngremer ola lir", ta paisa kuli kar dena ashi.

"NPF ya political party ka dang masü saka ibai nübur arakzüba (people's movement) ka lir". Congress nung tongti lenirtem aser tulur aika NPF nung denogo, parnok adenba kuliji tanga kecha masü saka party nükjidong aser inyakyim nungittsü tangatetba nung adenba lir, ta paisa ashi.

"Nagaland nung Naga nung


asoshi telemtetba tajung bener arutsü asoshi NPF dak dang teimla ajak lir", ta ashi. Aji oda, "Congress party-ji samadaki aser BJP-jia asenok den lir saka asenok BJP den adenba masü", ta paisa ashi. "BJP den tembarbo alitsü aser friendly match-bo asayatsü saka mendenbo melemsateptsü", ta paisa jangjashitsü.

Sentong temer külen osangbener senden ka alidang, "Party tsüngda telemsa alibaji karibo jembitsü akok aser kija karbo party nungia atsünga aotsü akok, saka tang tashibo onok tsüngda yamaji loksatsüsa meputepba kecha mali", ta iba osangbeneri asüngdangba ka langzüa ashi.

"Taruba election nungji regional party tasen kar adoktsü imlar asü?"

ta metetnüa asüngdangdang, "Nephiu Rio-i anir party tasen ka tenzüksü ta yimdang nung olulu jembiba angashir, saka iba jagi NPF party nungbo kecha tapok mapatsü", ta ashi.

May 9 nü assembly constituency pungu; 24 Angetyongpang, 25 Mongoya, 26 Aonglenden, 27 Mkg town, 28 Koridang den Ungma yimdak aser 23 Impur constituency pur den kasa telungjem senden Kobulong nung mena liasü. May 10 nü 21 Tuli constituency pur den Tuli nung aser 22 Arkakong pur Chuchuyimlang yimdak menogo. May 11 nü par telokisa 29 Jangpetkong aser 30 Alongtaki A/C pur den kasa telungjem senden ka Mangkolemba nung amentsü ayongzüka lir.



**MAY 11, 2018 ASAYA**  
Mumbai VS Punjab - 8:00 PM

**MAY 10, 2017 ASAYA OSANG**  
Delhi-i ball 2 anunga lia wickets 2 agi akok.

### P.B Acharya-i Aizawl FC nem tenüngsang agütsü

**Dimapur, May 10 (Agencies):** Nagaland aser Arunachal Pradesh Governor P.B. Acharya-i I-League season 10 buba akokba atema aser Northeast tesem nungi iba sempet mezüngbuba koka otsü tasen ka yanglutetba asoshi Aizawl FC tenüng asang.

Aizawl Football Club kibur aser tir Robert R Royte dangi shidi ka Governor-i züluba nung pai ashiba agi, "iba ya northeast aser Mizoram atema kanga dang takok tajung aser nüma atangtsü maparen ka lir. Club nung züngsemtem ajaki meranga inyakba ajanga takok nguogo aser iba ya ajak asoshi tatishitsü tajung asütsü. Iba takok ajanga lintik nung lanurtem nem külemi longjemmer inyakba ajanga takok

ngutettsü ta tatishitsü tajung agütsütsü."

Pai Northeast nem tenüng tajung bener arutsüba atema Aizawl FC nung asayartem, team management aser Mizoram Football Association nem tenüngsang agütsü.

Maneni pai Aizawl FC pusemertemi asaya tembangba sülen mapa tajung inyakba angazüka pelaba lemsatop.

Swachhat Bharat ambassador ka ama Governor-i Aizawl FC asemertemi Shillong Jawaharlal Nehru Stadium nung asaya tembangba sülen janatem merüktettsüba atema parnok tenüng asang aser iba amala yimya ya maneni ajak asoshi tatishitsü asütsü ta imlaba lemsatop.

### India U-17 Team-i Sporting Clube de Portugal makok

**Lisbon, May 10 (Agencies):** Europe sema asaya senzüba sentong nung Indian U-17 football team tatembangbuba asaya Sporting Clube de Portugal den asaya nung 2-1 agi tamakok angu.

Iba asaya nung Sporting Clube de Portugal nungi asayar Carlos Silva-i minute 40 nung aser Ussumane-i minute 51 buba nung ta goal agütsü.

India nung asayar Aniket Jadhav-i minute 41 buba nung goal agüja India team maneni tetokteptsü asoshi maongka agütsü saka ano paisa asaya tatemi goal agütsütsü asoshi

maongka tajung ka süia odaktsü.

Iba asaya ya kanga dang sütepa asaya saka half time atongtsü lia Portugal team-i India nung defence tsükpoka ia mezüng goal agütsü. Aji saka India nung asayartemi kanga meranga asayar half time süli Jadhav-i goal ka agüja goal kasa aküm. Iba sülen minute 5 majung tsüngda Ussumane-i Portugal pur atema goal tanabuba agütsü.

Luis Matos-i aniba India nung asayartem atema asaya tatemi Sporting puri penalty ka menaa maongka tajung ka angu saka Jadhav-i goal magütsütetü iba maongka amajok kümdaktsü.



**EVERYONE FEELS THE PAIN!**

**Oajm**  
FAST RELIEF FROM PAIN

A Product of LIVSAV Group  
CUSTOMER CARE- 0250-6580183

**BILEMDANGANG**  
"Takok tulu angutsü asoshi mapang nüngdaker"